

GOBANENG O LLA? BOLELA!

2  . . . le ka ntlong ya Morena. Ke mo go botse kudu go ba mo, le ka tirelong ya Morena Modimo wa rena.

3 Bjale, wo ka mehla ke mo—mo monyetla go nna go tla kerekeng, eupša go tla go Ngwanešu Junie mo, e no ba monyetla wo monnyane wa tlaleletšo. Ke tsebile Ngwanešu Junior nako ye nngwe. Gomme ke be ke thabile kudu go mmona a tsena ka tsela ye botse ye ya kgale ya Ebangedi, gomme a eya ntle a rera Lentšu. Go bona Morena a mo šegofatša, gomme batho bohle ba mo hlompha, seo se no makatša.

4 Bjale, ke a tseba go bile le batho ba bangwe fa mosong wo, bao ba otletšego ditsela tše telele, gomme ba swanetše go ya morago bošegong bjo, ka gore mohlomongwe, mohlomongwe go ya go šoma gosasa, lebaka la dimaele tše ntši, tlase ka Ohio. Gomme, goba godimo ka Ohio, ke be ke era go bolela. Gomme ke mohuta wa go lahlegelwa ke ditšhupetšo tša ka; godimo ka Ohio.

5 Gomme ka gona re tshepišitše gore, bošegong bjo, re tla ba le mo—mo mothalo wa thapelo. Kafao ga re nyake go le swarelela botelele kudu. Go a fiša. Gomme ka gona bakeng sa mothalo wa rena wa thapelo. Eupša re a tseba gore le šetše le šegofaditšwe ka moopelo le e ka ba eng le e dirilego. E—e šegofaditšwe go lena. Gomme re tshepetše go Modimo bjale gore O tla no tšwelapele go ba le rena le go re šegofatša, le go fa tlhogoloko ya pelo ya rena. Bjale le beile se sengwe le se sengwe le nago thwi ka go tirelo, šedi yohle ya lena, gohle go botega le tlhogoloko ye le ka kgonago. Gomme ke bile thapelang morago ga sekgaleta se bjale bakeng sa tirelo bošegong bjo.

6 Gomme, bjale, ke holofela go tla morago le go ba le lena gape ka pela. Gomme bohle le a re etela, godimo tabarenekeleng. Re ikwela gore kereke ye nnyane ye ke kereke kgaetšedi go tabarenekeleng. Seo ke se e lego. E no ba kereke kgaetšedi ye nnyane, ya tabarenekeleng. Ye, le godimo ga Ngwanešu Graham, le tikologong. Gomme kafao re thabile go etela kgaetšedi ya rena yo monnyane bošegong bjo. Gomme re a tshepa kgaetšedi yola yo monnyane o tla gola le go gola le go golela go mohumagadi yo mogolo. Gomme ke a dumela o tla dira, le yena, ka mo—mo mogau le thušo ya Morena.

7 Bjalo ka ge Paulo a boditše Timotheo, “Eba nakong, seh leng, le ka ntle ga sehla; eba nakong. Kgala—kgala, sola, ka pelofalo yohle le Thuto. Ka gore nako e tla tla ge ba ka se kgone go theetša Thuto ye e phedilego; eupša ka morago ga ditsebe . . . go hlohlona ga ditsebe tša bona, ba tla kgoboketsa barutiši . . .”

8 Kafao re a tseba, gore, Modimo go beng le rena ke se sengwe sa dilo tše kgolokgolo. Ke be ke le ka kamoreng, morago ga

sekgalela se, ke rapela. Gomme ke naganne, “Ke eng se sengwe se segolwane go tseba go feta o phološitšwe?” Bjale e nong go mpotša ke eng se se bego e tla ba se segolwane.

⁸ Ke boletše go mogwera wa ka, Ngwanešu Evans. Ke rile, “Ngwanešu Evans, ge nkabe ke ne konope ye nnyane fa yeo ke bego nka kgona go e tobetša, gomme ke be ke tla ya morago go bogolo bja mengwaga ye masomepedi, gomme ka ba mengwaga ye masomepedi bogolo lebaka la mengwaga ye dikete tše lesome, gomme ka ba kgoši godimo ga lefase lohle gomme ka se tsoge ka tšofala nthathana, ka no dula ke le wa mengwaga yeo; ka ba le se sengwe le se sengwe lefaseng, ka diatleng tša ka mong, gomme ka phela ka manonganong lebaka la mengwaga ye dikete tše lesome, gomme morago ka lahlega mafelelong a mengwaga ye dikete tše lesome. Goba, go gatelela konopi ye nngwe, le go hwa ka pela, ka Bophelo bjo Bosafelego.” Ke rile, “Ke be ke tla tobetša konope bakeng sa Bophelo bjo Bosafelego, ebile go se tsee kgopolو ya bobedi. Bakeng sa go ka reng ge . . .”

⁹ Morago o retologile, gomme o rile, “Ka nepagalo. Go ka reng ge nkabe re phetše mengwaga ye dikete tše lesome, gomme bošegong bjo, ka iri ya seswai goba ya senyane, mengwaga ya rena ye dikete tše lesome e be e fedile?” Ke lena bao.

¹⁰ Kafao ga go selo se segolwane go feta Bophelo bjo Bosafelego. Gomme Ke bja rena bohole. “Mang kapa mang a ratago a ka tla.”

¹¹ Bjale, Modimo ga a ye go swara motho boikarabelo ka gore, ka baka la gore ke modiradibe, ka baka la gore o tswetšwe e le modiradibe. Eupša se Modimo a yago go swara motho boikarabelo ka sona, ke ka baka la gore o dula e le modiradibe. Ga a swanelo go dula e le modiradibe, ka gore go na le sebaka se se dirilwego bakeng sa tokafatšo ya gagwe ka Jesu Kriste. Kafao re a tshepa, bošegong bjo, ge go ka ba ba bangwe ka gare goba ka ntle, ba ba sego ba be ba amogela Kriste, gore bjo e tla ba bošego bjo selo se sengwe se tlago go bolelwa goba go dirwa, seo se tla go phafošago, go lefelo leo o tsebago o hloka Kriste.

¹² Gomme ka gona ge o nno Mo amogela bjalo ka Mopholosi wa gago wa sebele, gomme o se wa be wa amogela Moya wo Mokgethwa, ke a tshepa gore bošegong bjo o tla O amogela.

¹³ Ke bona ba bangwe ba setšhaba sa tabarenekele mo. Ke ya go bolela se ka kgaetsedi yo mogolo. Le a bona? Selo se tee seo tabarenekele e se hlokago godimo kua ka kerekeng ya rena, ka tabarenekeleng ka Jeff, ke go ikgafelagape le go tlatšwagape ga Moya wo Mokgethwa. Nnete. Yo mongwe le yo mongwe go ya tlase aletareng le go rapela go fihla ba hwetša mpshafatšo ya Moya wo Mokgethwa, kereke ka moka e tlatšwe ka Maatla a Modimo, seo ke se re se hlokago. E sego feela tabarenekele fale, eupša Mmele wa Kriste, lefasepharephare, e hloka go tlatšwagape. Ke rata . . .

¹⁴ Dafida o boletše letšatši le lengwe, “Bušetša go nna thabo ya phološo ya ka.” Bjale o be a se a lahlegelwa ke phološo ya gagwe, eupša thabo ya yona. Gomme ge go etla go lefelo mo nka se kgonego go ipshina ka bodumedi bja ka, phološo ya ka, go na le se sengwe sa phošo felotsoko, gobane, “Ke thabo ya go se bolelege le go tlala letago.” Yo mongwe wa bona o rile, “Latswa gomme o bone, Morena o lokile. E latswega bjalo ka todi mo leswikeng.” Oo, ke thabile kudu gore ke latswitše Yeo. Morena o lokile. Gomme ke rata todi, eupša ga se ka ke ka latswa e ka ba eng boka Yeo. Yeo ke ye kaonekaone ke e tsebago.

¹⁵ Bjale re ya go hlaganelo thwi ka go tirelo, le go bona ge re ka kgona go ntšha kereke ka pela gore batho ba kgone go ya mafelong a bona, le a go rapela, goba go šoma gosasa, le magae a bona.

¹⁶ Gomme bjale re letile kopano ye kgolo ntle ka Lebopong la Bodikela, gonabjale. Gomme re kgopela le go sodipa dithapelo tša kereke ye le batho ba bohole, go nthapediša.

¹⁷ Mosong wo go bile le se sengwe se diregile. Ga se ka ke ka tsoge ka ya, le gannyane, go kereke ye nnyane, ntle le ge Modimo ka go ikgetha a ntiretše se sengwe. Ke no rata seo. Gomme mosong wo, ka morago ga ge ke feditše go rera, ka phethagalo ka lenaneo, Moya wo Mokgethwa o wetše magareng ga rena le go fa molaetša go Ngwanešu Jackson, wo o sa tšwago go kgomarelana le nna, morago ga sekgalela sohle. Gabotse, ke hwetša theipi, gore ke kgone go e raloka gape le gape, nka kgona go e hwetša. Ka gore, kgauswana, ke be ke ikwela... Mosadimogatša wa ka mo o a tseba. Ke be ke mmotša gore Morena o be a eya go nketela ka tsela ye nngwe, gonabjale. Gomme e ka no ba e bile molaetša wola mosong wo, ka gore o mphile mmono wa go fapano. O mphile sehlogo seo ke ratago go bolela ka sona bakeng sa dinakwana di se kae.

¹⁸ Ke rata go bala bjale go tšwa go Puku ya Ekisodo, tema ya 14 gomme temana ya 15.

*Gomme MORENA a re go Moshe, Ka fao o reng o ntelela?
bolela le bana ba Israele, gore ba ye pele:*

¹⁹ A nke ke bale ya 16, le yona.

*Eupša phagamiša... godimo lepara la gago,...
otlollela seatla sa gago godimo ga lewatle, gomme o
le aroganye: gomme bana ba Israele ba tla feta mobung
wo o omilego go kgabola bogare bja lewatle.*

²⁰ A nke Morena a oketše ditšhegofatšo tša Gagwe go palo ya Lentšu la Gagwe.

²¹ Gomme bjale a re inamišeng dihlogo tša rena feela nakwana bakeng sa thapelo. Gomme ge go na le batho ba ba itšego mo ba ba ka ratago go gopolwa ka thapelang ye, a nke le e dire e

tsebje go Modimo ka seatla se se phagamišitšwego. Morena a le fe tlhologelo ya lena.

²² Morena, rena bjale, ka potego le tlhompho le go swana le ngwana, re sepela godimo ga mabala a makgethwa a thapelo. Re beela thoko boima bjo bongwe le bjo bongwe, sebe se sengwe le se sengwe, kgopololo ye nngwe le ye nngwe yeo e re nyamisago gabonolo, gore re ke re kitime ka kgotlelelo lebelo le le beilwego pele ga rena. Gomme ge re sepelela ka go a a go šegofala, mašabašaba a makgethwa a thapelo, go tsebeng se, gore Jesu o rile, "Kgopelang Tate e ka ba eng Leineng la Ka, Ke tla e dira." Gomme gape go ngwadilwe, "Ge le dula ka go Nna, gomme Lentšu la Ka ka go lena, kgopelang se le se ratago, gomme le tla se direlwa."

²³ Ka gona re a tla, Morena, e sego leineng la kereke ye nnyane ye, goba leineng la modiša wa yona, le ge re ba rata, goba e sego ka leina la rena beng, gobane ga re ne selo go neela ka sona. Eupša re tla ka go Leina lela la go lekanelo gohle la Morena Jesu, Yo a re filego tshepišo, gore ge re kgopela ka Leina la Gagwe, re ka amogela e ka ba eng re e kgopelago.

²⁴ Gomme re be re ka se nyake go kgopela eng kapa eng e bego e le nonwane. Re be re tla nyaka go kgopela feela seo se tla thabišago Wena. O tseba maemo a rena. O tseba se re se hlokago. O tseba se kereke ye nnyane ye e se hlokago, le se motho ka motho a se hlokago. Gomme re tla Go rapela, Morena Modimo, go re fa, bontši, bjalo ka ge re ne ditlhoko. A nke Moya wo Mokgethwa wo mogolo o theogelete fase godimo ga moago wo le go dikologa batho ba, le go hlwekiša sehlopha se, gore Moya wo Mokgethwa o ke o be le tsela ya maleba go kgabola pelo ye nngwe le ye nngwe mo, bošegong bjo, go tloga go yo monnyane wa bana go ya go yo mogologolo. E fe, Morena.

²⁵ Diatla tše tseo di phagamišeditšwego godimo, ka kgontha O di bone, Morena. Ge phorogohlo e sa kgone go wela mokgotheng ntle le Wena go e tseba, ke bontši gakaakang O tsebago ge ngwana wa Gago a phagamiša seatla sa gagwe go leba Legodimong bakeng sa borotho. Re tshepišitšwe gore e ka se amogele letlapa, sebakeng. Re a tseba gore O tla ba fa borotho bjoo ba bo kgopelago. Gomme re tla kgopela, go elelwa bohole bao ba babjago le go tlaišega.

²⁶ Ke thabile kudu go kwa go tšwa go Ngwanešu Rogers, gore o rile o ikwetše gabotse go lekanelo go ya mošomong. Re thabetše seo kudu, Morena. Re rapela gore O tla mo fodiša, gore kankere yeo e ka se be le tse—tse tsela ya maleba, eupša e tla emišwa ke Madi a Morena Jesu. Ka tumelo re bea Madi a Morena Jesu gare ga kankere ya lehu le ngwanaborena.

²⁷ Bjale re kgopelela bohole bao ba hlokago, mogohle. Hwetša letago go Wenamong. Hlompha Lentšu la Gago, Morena, bjalo ka ge re Le badile. Gomme re fe tirelo ye kgolo ya phodišo.

Bakeng sa letago la Modimo re a e kgopela, Leineng la Morena Jesu. Amene.

²⁸ Bakeng sa sehlogo, bosegong bjo, ke tla rata go šomiša mantšu a mararo: *Gobaneng O Lla? Bolela!* Gomme bakeng sa thuto, ke tla rata go šomiša, “Mokgwatebelelo wa batho go motlotšwa wa Modimo,” feela bakeng sa nako ye kopana, mohlomongwe metsotso ye masomepedi, goba masometharo, morago re tla thoma mothalo wa thapelo.

²⁹ Modimo o be a biditše Moshe, pitšo ya go ikgetha. Gomme ge Modimo a bitša monna le go mo tlotša bakeng sa mo—mo mošomo wo o itšego, O letela monna yola go dira seo, go ya letereng. Modimo ga a nyake go fa monna thomo, gomme yena a phoraphora go dikologa mabapi le yona. O mo nyaka a ye pele ka go otloga le go dira feela tlwa se a romilwego go se dira. Le se ke la lebelela go la go ja goba la nngele, e nong go suthela pele.

³⁰ Gomme bana ba Israele ba be ba le ditlemong lebaka la mengwaga tsoko ye makgolonne, eupša Modimo o be a tshepišitše gore O be a tla ba etela. Gomme Modimo o boloka tshepišo ye nngwe le ye nngwe yeo A e dirago. A ka se kgone go aketša. Yena ke Modimo. Gomme nako e tlie bakeng sa ketelo ye.

³¹ Gomme ke a dumela, bosegong bjo, go bapela, gore Modimo o dirile tshepišo gore O tla bowa gape. Ke a dumela gore re kgauswi le nako yeo. Mosong wo, ge ke be ke bolela ka thuto yeo, Ke be gabotse nka kgona go kwa mo—mo moela, go bolela seo, bokgauswi bja Morena Jesu.

³² Bjale, Moshe a bileditše morero wo, eupša o be a le motho. Modimo o mo hlahlile mengwaga ye masomeseswai pele A ka tsoge a kgona go mo šomiša; mengwaga ye masomenne ka paleising le mengwaga ye masomenne ka lešokeng.

³³ Modimo a ka hlahlala motho, go Mo tsea mengwaga ye lekgolo, bakeng sa mošomo wa metsotso ye masometharo. Modimo o tseba mokgwa wa go hlahlala.

³⁴ Se dikolo di se beilego ka go Moshe, mengwaga ye masomenne, go tšere mengwaga ye masomenne go se ntšhetša ntle. Eupša nako ye nngwe ka Bogoneng bja Tlotšo, nako ye nngwe ka Bogoneng bja Sethokgwa se se tukago, o tsebile bontši ka ga Modimo go feta a ithutile ka dipukung mo mengwageng ye masomeseswai ya bophelo bja gagwe.

³⁵ Modimo o hlahlala banna ba Gagwe, morago o a ba tlotša, o ba fa boitemogelo, o ba tsea go kgabola tlhahlo ya bothata, go theoga go kgabola mašabašaba a kotlo ya go tuka, go leka, go leka. Ga A dire feela seo go baprofeta ba Gagwe, eupša O se dira go bana ba Gagwe. “Morwa yo mongwe le yo mongwe yoo a tlago go Modimo o swanetše go solwa le go lekwa,” go lekwa ka Lentšu la Gagwe. Le a bona, ge go tšipa go e etla, nako ya go tia,

ge e lebana le lehu, a o kgona go ema kua godimo ga Lentšu la Modimo, wa re, “Modimo o boletše bjalo. Seo se a e rarolla”?

³⁶ Gomme Modimo o be a biditše monna yo mobjalo, gomme monna yoo e be e le Moshe. Eupša Moshe, karolo ye kgolo go swana le rena, nako le nako ge go etla lefelo go se sengwe se bego se swanetše go dirwa, Moshe o biditše, “O Morena, ke swanetše go dira eng ka lefelong le?” Bjale a seo ga se no ba boka re dira? Modimo o mo šegofaditše le go mo tlotša ka godimo ga baena ba gagwe, a mo fa molaetša le bodiredi bjo bo bego bo se bja ba lefaseng go tloga letšatši leo, go fihla letšatši lela. Gomme, efela, nako ye nngwe le ye nngwe se sengwe se diregile, Moshe o tšhabetše go Modimo ka sona, “Morena, ke swanetše go dira eng? Ke swanetše go dira eng ka go taba ye?”

³⁷ Modimo o bile mohuta wa go lapa ka yona, ke a dumela. O rile, “Gobaneng o llela go Nna? Bolela le batho gomme le ye pele.” Nna, ge nako e ka ba efe e kilego ya bogega boka ba swanetše go gomela morago, e bile nako yeo, eupša Modimo ga a ne go gomela morago.

³⁸ Ga go na lefelo go gomela morago, ka go Modimo. Eya pele. Ngaka o re, “Ke kankere,” eya pele. Ge a re, “Ke TB,” eya pele. Ge diabolo a re, “O ka se kgone go tlogela se,” eya pele. Ge legae la gago le bolela gore o ya go ba lehlanya; eya pele. Kereke e go raketše ntle; eya pele. Ga go sa na go gomela morago. Eya pele.

“Bolela, gomme o ye pele.”

³⁹ Bolela (eng?) Lentšu la Gagwe, gomme o ye pele. “O RIALO MORENA,” gomme eya pele. Goelela batho.

⁴⁰ Eupša batho nako yeo ba tsogile maatla gomme ba re, “Go ka be go bile bokaonana gore re hwe tlase ka Egepeta. Go ka be go bile bokaonana gore re bile le mabitla a rena a swailwe, go feta go tšwa go diphiri le manong go topa marapo a rena ka lešokeng le. Ka baka la eng o re tlišitše ntle mo?” Ka morago ga ge ba bone gore Modimo o dumeletše Moshe go ba mohlanka wa Gagwe.

⁴¹ Modimo, ge Modimo a etla ka go motho, goba go batho, ka go phuthego, ka go monna goba mosadi, O hlatsela Bogona bja Gagwe. Modimo o netefatša gore O fao. Ka gore ge Modimo a etla, maswao a kagodimogatlhago a thoma go bonagala. Motho yo o ba motho yo a fetogilego. Ga ba sa le boka ba be ba le. Sebe se nyamaletše go tloga bophelong bja bona. Poifo le go kamaka di timeletše, kgakanegokgolo. Ba kgwahlide, ba tiile. Go phela goba go hwa, ke Kriste. Ga ba kgathale se se tlago goba se se yago. Ga se gona se ba šikinyago. Ba sepelela pele.

⁴² Gomme Moshe a tshwenyegila ka batho, gomme batho ba tshwenyegile ka Moshe. Gomme o rile, “Re swanetše re dire eng?”

Gomme, “Eyang pele,” e be e le karabo.

⁴³ Bjale ba rile, “Re ntle ka lešokeng le, gomme madira a Farao a a re batamela, ba kampile feela ka morago ga rena.” Eupša Moshe o tsebile go obamela Modimo.

⁴⁴ Gomme ge Modimo a romela moemedi, gomme A tlotsa moemedi yo, gomme a e romela ka lefaseng, batho ba swanetše go obamela moemedi yoo. Ka mehla go bile ka tsela yeo, gohle go theoga go kgabola Beibele.

⁴⁵ Moshe o be a bileditše mošomo. Modimo o be a rile, ka Lentšung, O be a tla e dira. O tshepišitše gore O tla romela se—se selo se se bjalo ka letšatšing leo, go ba lokolla. Gomme Modimo o dirile karolo ya Gagwe, o rometše Moshe. Gomme bana ba Israele, feela ka baka la gore dišitiši tše nnyane le dilo di tlie mmogo, go ba leka, ba paletše ke go matšha le Moshe.

⁴⁶ Bjale a seo ga se no ba boka lehono? Re bona Molaetša o etla pele. Re bona Kereke e tsogela lefelong, godimo ga diphego tša Moya wo Mokgethwa, go fihla Maatla a Modimo a tsikinya motho yo mongwe le yo mongwe ka kua. Letago la Modimo le wela go dikologa, gomme maswao le matete a direga. Bonnyane go feta beke, Sathane o dumeletše go tla ka phuthegong yeo. Gobaneng a e dira? Modimo o a e dumelela. Gomme nako yeo kereke e thoma go popoduma, e wela morago. “Mohlomongwe Go be go se bjalo.” Fao ke mo re palelwago. Yeo ke go palelwa ga kereke. Go sa kgathale se se diregago, ke Modimo. Sepelela pele.

⁴⁷ “Gabotse,” o re, “ngwanešu *Semangmang* šole. Ke goeeditše phenyo le yena, eupša o morago . . .” Ga go kgathale se a se dirilego, seo ga se ne selo go dira le wena. “Gabotse, profesa *semangmang* o boletše gore Seo se be se se sa loka, seo e be e se sa mo—mo Morena.” Ga go kgathale se profesa a se boletsego bjalo, ke wena mothaka yo a emego mafelong a makgethwa. Wena o mothaka a bego a le sethokgweng se se tukago.

⁴⁸ Go ka reng ge, diprofesa tša Egepeta, go ka reng ge Farao a ka be a ile a re go Moshe, “Oo, o no eleletša o bone sethokgw. O naganne o bile le . . . Seo se be se rora ka ditsebeng tša gago”? Moshe o tsebile mo a emego. Moshe o tsebile Se se boletsego le yena.

⁴⁹ Gomme motho yo mongwe le yo mongwe yoo a tswetšwego ka Moya wa Modimo, o tseba se se bolelago le yena ge Moya wo Mokgethwa o etla. O bolela ka khutšo ye e fetago kwešišo.

⁵⁰ Moshe o be a biditše. Yena le Modimo nako yeo . . . Ka morago ga ge Moshe a amogetše pitšo ya gagwe, o ile tlase Egepeta. Nako yeo o be a swanetše go dira batho go mo dumela. Bjale, o be a le mopropeta yo a tloditswego wa Morena, eupša batho ga se ba mo dumela; le ge Yena, Modimo, a e netefaditše, ka maswao le matete ao A a dirilego. Gomme ka baka la gore ba be ba sa dumele Moshe, mohlanka wa Morena, nako yeo ba wele ka lešokeng, gomme yo mongwe le yo mongwe wa bona o hwile, yoo a tlogilego Egepeta. Ga go le o tee wa bona a phološitšwego.

Yo mongwe le yo mongwe o hwile gomme a senyega, ntle le Joshua le Kalebe, ba ba thomišitšego, gobane ba popodumile le go ngongorega kgahlanong le Molaetša wo o hlatsetšwego woo Modimo a o boletšego ka Beibeleng.

⁵¹ Oo, ge ke nagana ka seo! Ge Modimo a tshepiša e ka ba eng, Modimo o boloka Lentšu la Gagwe. Gomme ge Modimo a tiišetša Lentšu leo go wena, gona Le dumele. Modimo o tshepišitše, "Ka matšatšing a mafelelo, O be a tla tšhollela Moya wa Gagwe godimo ga nama yohle. Gomme masogana a lena a tla bona dipono, bakgalabje ba tla lora ditoro. Gomme godimo ga balata ba Ka le mohlanka wa mosadi Ke tla tšhollela Moya wa Ka. Le go bontšha maswao ka magodimong, le ka lefaseng, gomme maswao a magolo le matete a tla direga mo matšatšing a mafelelo." Gomme ke rena ba mo matšatšing a mafelelo, gomme Modimo o boloka Lentšu la Gagwe. Moya wo Mokgethwa o fa, gomme O hlatsela go Tla ga Morena Jesu. Gomme batho ba O gana, le go popoduma kgahlanong le Wona, feela boka go bile. Yeo ke tlhakodišo ya rena.

⁵² Moshe o be a le ko—ko kota ya leswao ya tlhakodišo ya Israele, go ya ka Lentšu la Modimo. Nako e be e batamela kgauswi. Modimo o rometše Moshe. O be a le Seetša sa Modimo sa letšatši leo.

⁵³ Gomme, lehono, nako e batamela kgauswi. Dipomo tša athomo di komana. Lefase le ya go thuthupišwa ka diripana, gabotse ka pela, melora gohlegohle lefaseng, ga go selo eupša molora wa bolekheno. Nako e batametše. Gomme Modimo o tshepišitše O be a tla tšhollela Moya wa Gagwe le go ntšhetša Kereke ya Gagwe ntle. Gomme Moya wo Mokgethwa o fa go emela seo, ka maswao le matete, go netefatša gore Yena ke Jesu Kriste wa go swana, ka sebopego sa Moya wo Mokgethwa, o dira modiro wa go swana woo A o dirilego ge A be a le fa mo lefaseng.

⁵⁴ E foufatša batho. Ebangedi ka mehla e foufatša batho ge ba sa bule mahlo a bona. E ba gore o a sepela, goba E foufatša batho.

⁵⁵ Ee, taba ye nngwe le ye nngwe ka Beibeleng, ge Modimo a rometše motseta, gomme motseta yola a amogetšwe, go bile le tsošeletšo mo nakong yeo. Eupša ge ba be ba se ba amogelwa, go be go se tsošeletšo, eupša feela tlhakahlakano e latetše gosedumele.

⁵⁶ Kafao go bjalo lehono, ga go selo sa fase. Ke a nagana, lehono, ke tla rata go bolela ka mosadi yo motee yo ke naganago ka yena, ka Beibeleng. Gomme o be a le yo mobe, le go thoma, a bodile go fihla kgwekgweng. Yo moswa, mosadi yo mobotse, ka leina la Rahaba. O be a le mohetene, le go thoma. Gomme o be a le mmalegogwana mo mokgotheng. Eupša o kwele gore go be go le Modimo, e sego modingwana yo a bego a dutše a le semuma, goba kwalakwatšo ya dithutotumelo; eupša Modimo yo

a phetšego magareng ga batho ba Gagwe, le go ba tlotša, gomme maswao le matete a be a ba latela. O kwele ka yona.

⁵⁷ Letšatši le lengwe, baemedi ba babedi ba tla Jeriko. Gomme ka pela, yena mo mokgotheng bjalo ka mmalegogwana, o ba biditše, o ba tšeetše ka ntlong ya gagwe. O rile, “Ba ka morago ga lena.” Gomme o ba fihlile.

⁵⁸ Gomme ke rata mokgwatebelelo wa gagwe. Ga se nke a re, “Ke tla dumela, ge ke bona Joshua yo mogolo yo a tloditšwego a dira leswao le rilego. Ge nkabe ke bone Moshe a dira a mangwe a maswao, nkabe ke dumetše.” Eupša o rile, “Ke kwele.”

“Tumelo e tla ka go kwa, go kwa Lentšu.”

⁵⁹ “Ke kwele gore Modimo wa Legodimo, Yo e lego Modimo wa kgontha, o na le lena bohle. Gomme O dirile maswao a magolo le dimaka. O omišitše Lewatle le Lehurbedu. O tlišitše dikotlo godimo ga Egepeta. Re bona ka fao A retolletšego lenaba godimo diatleng tša lena, gomme naga ya rena ka moka e a roromela, ka lebaka la yona. Ke kgopela kgaogelo.”

⁶⁰ Ga se a re, “Ke tla swanelo go bona Modimo yo, pele. A nke ke tsee kahlolo ya ka gomme ke tsee se Lengwalo la ka le se bolelagoo ka seo.” Gomme, le a bona, a ka se tsoge a e hwetša.

⁶¹ Eupša, “Tumelo e tla ka go kwa, go kwa Lentšu la Modimo,” gomme o dumetše.

⁶² Gomme ge mantšu a tlišitše morago go Joshua. Lentšu *Joshua* le ra “Mophološi,” go swana le *Jesu*. Mo... Ge a tlišitše morago go Joshua, motlotšwa wa Modimo, ntlo ya gagwe ya dumeloloo go ema. Gomme ge batho ba matšitše makga a lesometharo go dikologa maboto a Jeriko, gomme ba letša phalafala, lefelo le lengwe le le lengwe mo lebotong lela le wele, eupša ntlo ya gagwe, gobane o dumetše pele a bona e ka ba eng. O e amogetše. O rile, “Ke bahlanka ba Modimo yo Godimodimo, gomme ke tla e amogela godimo ga motheo wa go e kwa. Ke a e dumela.” Tumelo e tla ka go kwa. O e kwele. O e dumetše. O e amogetše.

⁶³ Gomme elang hloko, ba rile, “Tlema lenti le lehubedu le o re fološetšago fase ka lona, le tleme ka lefastereng.” Bjola “bohubedu” bo boletše ka Madi a Jesu, poelano. Gomme lefelo le lengwe le le lengwe ka lebotong lela le wele, eupša ntlo ya Rahaba. E dutše godimo ga leboto. Modimo o mo hlomphile. Gomme O... O bone bjalo ka mohlolo wo mogolo o dirilwego fale bjalo ka ge go be go le go omiša Lewatle le Lehurbedu. Ka gore, seatla sa Jehofa se be se le godimo ga lefelo le lennyane lela, go le šireletša. O be a e amogetše, Modimo o tloditše. Bahlanka ba Modimo ba ile godimo fale, ba tloditšwe, gomme o e dumetše. Pele a bona mehlolo, o e dumetše, go le bjalo, gomme o e amogetše.

⁶⁴ Eliya, moprofeta wa Morena, a tloditšwego. Oo, ee, Modimo o mo tloditše go ba moprofeta. O be a le modiša Eliya. Ga ke eleletše Isebele o be a tla nyaka go mmitša seo, eupša o be a le modiša wa gagwe go no swana. Modimo o mo dirile modiša wa gagwe, kafao o mo hloile. Gomme Modimo o mmoditše, o rile, “O rotogela thabeng gomme o dula fase fale. Ke laetše magokubu go go fepa. Ke tla go noša go tšwa nokeng ya Kerithe.” Gomme o dula fase kua.

⁶⁵ Gomme kgoši o rile, “Eyang le hwetše lehlanya lela gomme le mo tliše tlase fa.” Gomme masole, bohle ba hlamišitšwe ka taelo ya kgoši, ba thomile go rotoga thaba.

⁶⁶ Gomme Elisa go molaleng o phagametše godimo le go bolela se sengwe boka se, “Bakgomana, le ke lefelo le lekgethwa. Ke biditšwe ke Modimo go ba moprofeta wa Gagwe. O nthomile go ema godimo ga mabala a, le go kwalakwaša molaetša wa Gagwe. Gomme molaetša wo ke nago le wona bakeng sa lena, ‘Le se ke la batamela lebala le.’” Amene. “Tlogang mo, lena mašoboro. A ga se la bala ge Moshe mohlanka wa Morena a kgabaganyeditše mošola wa noka, gomme mašoboro a lekile go mo ekiša? Bohle ba nweletše. Tlogang lefelong le.”

⁶⁷ “Oo,” ba rile, “setswialegotlo sela sa kgale! O tšwa sekolong sefe? Re tla ya ka gare, go le bjalo.”

⁶⁸ Eliya o rile, “Ge ke le monna wa Modimo, a nke mollo o we go tšwa Legodimong gomme o hlatseli bodiredi bja ka.” Gomme e ka ba ka nako yeo, mollo o wele le go tš huma masometlhano.

⁶⁹ Kgoši a ka no ba a rile, “Legadima le ba rathile.” Kafao o rometše masometlhano a mangwe, gomme selo sa go swana se diregile. Gosedumele.

⁷⁰ Banna ba ba kwera le go kwera le go dira metlae ka Kereke ye e tloditšwego ya Modimo wa go phela ba tla senyega letšatši le lengwe ka heleng. Ba ka no be ba ka se swe metsotso e se mekae. E ka no ba nako ye telele.

⁷¹ Kafao ke mafelo a makgethwa. Motlotšwa wa Modimo o eme godimo kua. Ga go sa go se bolle goba selo sa go se hlweke se ka kgonago go tsena lefelong lela. Yeo ke therešo. Ge baekiši ba leka go dira ka mokgwaa woo o ka rego ba a e dira, o tla hwetša ka pela ba tla go lefeela. Eupša baekiši ba hlatsela eng? Gore go na le kgontha. Go na le Modimo wa kgontha. Go na le batho ba bangwe ba nyakago go . . . Ga ba e dumele, eupša ba nyaka go dira mo o ka rego ba a e dumela. Eupša motho yo a tsebago Modimo, ke motho yo a tswetšwego gape ka Moya wo Mokgethwa le go tlatšwa ka Maatla a Modimo, ka “O RIALO MORENA,” gomme o ya pele. Ba a tseba se sengwe se rathile pelo ya bona. Ba a tseba gore ba a rereša.

⁷² Kafao Elisa o be a le monna wa Modimo, a tloditšwe, gore ba be ba sa dumele.

⁷³ Lebelelang Dafida ge a dutše le Nathane moprofeta. Dafida, monna ka morago ga pelo ya Modimo mong, gomme o be a le motlotšwa. Modimo o mo tloditše kgoši. Dafida o be a se feela kgoši, eupša o be a le moprofeta. Kafao Nathane o be a le moprofeta yo mogolo wa setšhaba. Dafida o be a le, bontši goba bonnyane, moreti le moprofeta, mongwadi wa pina, rammino. Gomme seprofeto ka kgontha, ka setlogong sa sona, se swana kudu le pi—pi pina, ge ba profeta.

⁷⁴ Ka gona, letšatši le lengwe ge moprofeta le kgoši ba be ba dutše mmogo, Dafida o rile, “Ga se gwa loka go nna go phela ka ntlong ya mosetare, gomme areka ya Modimo wa ka, ka tlase ga tente.”

⁷⁵ Gomme ke nyaka le theetše, mantšu a go tsebalega a Nathane. O rile, “Dafida . . .” Oo, le se šitwe go hwetša se bjale, tsenang gare ga methaladi. “Dafida, dira tšohle tše di lego ka pelong ya gago, ka gore Modimo o na le wena.” Oo, nna, ge ke nagana ka seo! “Dafida, dira tšohle tše di lego ka pelong ya gago, ka gore Modimo o na le wena.”

“Gobaneng o llela go Nna?”

⁷⁶ Modimo o na le wena. Bolela gomme o ye pele. Modimo o go tloditše. Sepelela pele. O se ke wa go phapharega, bolela *se, sela*, goba se *sengwe*. “A ke swanetše go dumela Modimo? A ke swanetše go Mo tshepa bakeng sa se?” Mo tshepe bakeng sa mohemo wo mongwe le wo mongwe o o gogago.

⁷⁷ E be e le Mogenerala yo mogolo Stonewall Jackson, yo a bilego mogenerale wa ka wa mmamoratwa ge e sa le Joshua. Stonewall Jackson o botšišitše nako ye nngwe, “O ka kgona bjang go ema le banna ba go tlala seatla, mola kganetšo e le ye kgolo bjalo?”

⁷⁸ Ke ka mokgwa wo a hweditšege leina la gagwe la “Stonewall.” O be a sa katakate. O be a sa tsebe go gomela morago. Re ka kgona go fa maatlataolo go monna wa go swana le yoo eng? Monna, ge Mayanki a etla fase ka dikete, gomme o eme fale ka bonnyaneng, eupša ga se nke ba ke ba mo šuthiša. O be a eme bjalo ka leboto la letlapa. Ka moka bohole ba sešole sa marabela ba boetše morago! Ryans o tlide mmogo, o rile, “Molato ke eng ka Jackson? Gobaneng a sa ye?” O rile, “O eme boka leboto la letlapa.” Ke moo a hweditšege thaetlele ya gagwe.

⁷⁹ Digenerale tše dingwe di mmotšišitše, di rile, “Mna. Jackson . . .” Yo monnyane, moisa wa nthathana, hlogontsho le mahlo a bolou, o be a ka ba feela diintshi tše tlhano botelele, wa magareng kudu, moisa yo monnyane wa go bolela magareng. O rile, “Mna. Jackson, o ka kgona bjang go ema, ka go kganetšo ye bjalo?”

⁸⁰ Ka mokgwa wa dihlong, o ile a ragela putsu ya gagwe fase. O rile, “Ga ke tsoge ka nwa meetse ntle le ge ke leboga Modimo bakeng sa wona pele.”

⁸¹ Ke mo e lego. Ga go go gomela morago ka go Modimo. “Bolela gomme o ye pele.” Yeo ke therešo. Yeo ke thomo ya Modimo go Kereke ya Gagwe. Ga re na le nako ya go nyefiša.

⁸² Ba re, “Tsošeletšo e fedile.” Ga se ya fela. Eya pele. “Ke nako yeo pentecost e bapalwago ntle.” Ga se yona. Ke nako bakeng sa pentecost go tsoga Leineng la Jesu Kriste le go ya pele. Ga go na le go gomela morago. Ga go na le go dula lefelong le le swanago. A re sepeleng ka Moya, goba Moya o tla sepelela pele go yo mongwe gape le go le tlogela le eme. Le a O latela.

“Dira tšohle tšeо di lego ka pelong ya gago, ka gore Modimo o na le wena.”

⁸³ Ge Jesu a tlie: Beibele e rile, Petro o rile, “Ka letšatši la Pentecost, Jesu wa Nasaretha, Monna yo a netefaditšwego ke Modimo magareng ga lena, (bjang?) ka maswao, mehlolo, le dimaka, tše A di dirilego magareng ga lena bohle. Ka gore lena bohle, lenabeng, le hlatse go se.” O be a le eng? O be a le Yena wa go šoma ka maswao, a tloditšwe. Lefelo le lengwe E rile, “Jesu wa Nasaretha, Monna yo a netefaditšwego ke Modimo magareng ga lena.” Netefatšo ya Modimo e be e le godimo ga Gagwe. O Mo netefaditše bjang? Ka maswao, dimaka.

⁸⁴ Jesu o rile, “Ge Ke sa dire mediro ya Tate wa Ka, gona le se Ntumele. Eupša ge Ke dira mediro ya Tate wa Ka, gona dumelang mediro, ge le sa kgone go Ntumela bjalo ka Motho.” Ka mantšu a mangwe, O rile, “Ge le sa kgone go dumela Ke nna—Ke nna Yena, le tla hwela ka dibeng tša lena. Eupša ge le sa Ntumele, bonnyane dumelang mediro ye Ke e dirago.” Oo, O ile a netefatšwa ke Modimo, ka maswao.

⁸⁵ Nikodemo o e hlagišitše gabotse, ge a tlie bošego. Gomme o rile, “Mong yo Botse, re a tseba gore Wena o morutiši yo a tšwago go Modimo.” Amene. Ba be ba ka se kgone go e uta. “Re a tseba gore O morutiši yo a tšwago go Modimo, ka gore ga go motho a ka kgonago go dira dilo tše O di dirago, mediro ye O e dirago, ntle le ge Modimo a be a na le yena.” Ba lemogile gore O be a netefaditšwe ke Modimo, a tloditšwe ke Modimo. O be a le mohlanka wa Modimo.

⁸⁶ Kereke e ile ya swanelwa ke go e lemoga, le ge ba be ba Mo hloiole. Ba mmiditše diabolo. Ba lekile go hwetša mehuta yohle ya maitshwarelelo. Eupša ge go etla go lebana le dintlha, ba dumetše gore O be a le Yena motlotšwa, eupša ba naganne kudu ka metlwae ya bona go feta ba dirile tlotšo ya Modimo.

⁸⁷ Banna le basadi lehono ba tla tšoena maemo a leago ka kerekeng, ba tšoena sehlopha tsoko sa bohlale, ka gore ba rata go tsena ka go dikarolo tša bohlale, ge ba tseba gore Moya wa Modimo o na le Bophelo gomme o a sepela. Kriste o a swana maabane, lehono, le go ya go ile. Gomme ka tsela ye A bego a le nako yela, yeo ke tsela ye A lego bjale, gomme o tla ba go ya go ile. Gomme Motseta wa Modimo o mo, Moya wo Mokgethwa. Go

O gana ke lehu, go O amogela ke Bophelo. O netefaditšwe! Batho ba O amogela bjang?

⁸⁸ Bjale, Moya wo Mokgethwa o ne Molaetša o tee, “Bolela Lentšu. Eya pele.” Yeo ke nnete. “Le se llele go Nna. Lentšu šeleo. Le bolele gomme o sepelele pele,” O RIALO MORENA. Woo ke Molaetša wa Moya wo Mokgethwa.

⁸⁹ Bjale batho ba thoma go popoduma. Ba wele. Ga re nyake go popoduma.

⁹⁰ Mediro ye Jesu a e dirilego ke eng? O rile, “Mediro ya Ka e a Mpega. Mediro ya Ka e netefatša Yo Ke lego. Mediro ya Ka e a Hlatsela.”

⁹¹ Ge Modimo a rometše Moshe, mediro e mo hlatseditše. Ge Modimo a rometše Eliya, mediro e mo hlatseditše. Ge Modimo a tlotša motho, mediro ya gagwe e a mo hlatsela.

⁹² Ge Modimo a rometše Moya wo Mokgethwa ka matšatšing a a mafelelo, mediro e a O hlatsela. Go tšoena kereke, go tšoena mokgatlo, go amogela thutotumelo goba thuto; ge woo e le Moya wo Mokgethwa, gona ka mehla go bile le Moya wo Mokgethwa ka go mehuta yohle ya mabodumedi. Eupša Moya wo Mokgethwa wo o swanetše go ba Moya wo Mokgethwa wa go swana wo O bego o le morago ka Letšatšing la Pentecost, goba Wona ga se Moya wo Mokgethwa wola wa go swana. Wona ga wa tsoge wa fetoga. Ke Moya wa go swana. O swanetše go phela go ya go ile.

⁹³ Jesu o rile, “Mediro ye Ke e dirago; yo a dumelago go Nna.” Mokgethwa Johane 14:7. “Yo a dumelago go Nna, mediro ye Ke e dirago o tla e dira le yena. Yo a dumelago go Nna!”

⁹⁴ Ga go motho a ka dumelago Jesu Kriste go ba Morwa wa Modimo go fihlela a amogetše Moya wo Mokgethwa. O no ba o o tsea ka tumelo le go O amogela. O ka se kgone go bolela gore Ke wona. O ka kgona go re, “Ke a dumela Ke wona.” “Eupša ga go motho a ka kgonago go bitša Jesu Kriste go fihla Moya wo Mokgethwa o le ka go yena.” Beibele e boletše bjalo. Moya wo Mokgethwa o swanetše go tla ka gare, pele, morago O fa bohlatse. O a tseba, ka bowena, gore Jesu ke Kriste, ka baka la gore O phela ka go wena. Gona Moya wo Mokgethwa wola wa go swana o itsebiša Yenamong ka batho, “Gomme maswao a a tla latela bona bao ba dumelago.”

⁹⁵ Gomme kereke e a O sega le go dira metlae ka Wona. Re no phela ka letšatšing leo. Se—se seemo se a lokišwa bakeng sa pomo ya athomo, bakeng sa kahlolo.

⁹⁶ Kereke e ba komana bakeng sa Tlhatlogo. Re letile. Ditetelo, di letile! Kereke e letile go Tla ga Morena.

⁹⁷ Lefase le a šišinyega, ke a makala ke ofe a yago go dira pomo pele ga yo mongwe. Ga re kgathale ke ofe a fihlago fale. Re ya Fa, kafao ga go kgathale ke ofe a fihlago fale. Ga e na le selo go dira le rena.

⁹⁸ Re no ba re hlalala, re thabile, le go dumela gore letšatši le lengwe re tla kwa modumo go tšwa Legodimong, gomme šo O tla tla. Gomme Kereke ya Gagwe e tla ubulelwa godimo sebakabakeng, go kopana le Yena le go ba le Yena.

⁹⁹ “Yo a dumelago go Nna, mediro ye Ke e dirago o tla e dira le yena.”

¹⁰⁰ Petro o rile, “Jesu wa Nasaretha, moprofeta yo a tloditšwego, o tloditšwe le go netefatšwa ke Modimo magareng ga lena bohle, bao lena bohle, lenabeng, le a tseba.”

¹⁰¹ Beibele e boletše, gape, gore, “Modimo o tloditše Jesu Kriste ka Moya wo Mokgethwa, gore O ile gohle a dira loka, a fodiša balwetši.” Leo e be e le leswao gore O be a le se A tteleimago go ba sona.

¹⁰² Yeo ke tsela ye Modimo a O romelago. Yeo ke tsela ye O swanetšego go tla ka go letšatši la mafelelo. Gomme Moya wo Mokgethwa wo o tlago ka matšatšing a mafelelo ga se wa go re gogela go thutotumelo, ga se wa go re gogela kerekeng. Ke go re gogela go Modimo, gomme maswao a kagodimogatlhago ke go latela Moya wo Mokgethwa wola. Maswao a Moya wo Mokgethwa ke eng? Ge Jesu wa Nasaretha a be a le Monna yo a netefaditšwego ke Modimo, a tloditšwe ka Moya wo Mokgethwa, a re boneng ke mohuta ofe wa Molaetša A bilego le wona. O dirile eng? O dirile bjang? Le bona tiro ya Gagwe, gona re ka kgona go latela ditiro tša Gagwe.

¹⁰³ Re hwetša gore ge la mathomo A etla pele, go bodiredi bja Gagwe, mo mengwageng ye masometharo, ge A tloditšwe ka Moya wo Mokgethwa, selo sa pele A se dirilego, O kopane le monna ka leina la—la Petro. Gomme O mmoditše, o rile, “Leina la gago ke Simone, gomme o morwa wa Jona.” Gomme o Mo dumetše.

¹⁰⁴ Gobaneng? Moshe o be a boletše pele ga nako ya gagwe, gomme o rile, “Morena Modimo wa lena o tla tsoša Moprefeta feela boka nna. Leo e tla ba leswao. Le tla tseba. O tla ba Modimo Moprefeta. Mesia yola o tla ba bobedi Modimo le Moprefeta, gomme O tla dira leswao la Moprefeta ge A dira.”

¹⁰⁵ Boka Bajuda lehono. Lewi Pethrus o rometše godimo milione wa Dibeibele go Bajuda bale, Ditestamente tše Mpsha, bao ba tšwago tlase ka dikarolong tše dingwe tša lefase, gomme ga se nke ba ke ba kwa ka Jesu. Ba bile tlase kua lebaka la mengwaga ye makgolo a masomepedi tlhano. Ba thoma go bala Testamente ye Mpsha yela. Gomme ba rile, “Ge yo e le Mesia, re a tseba gore Mesia o tla ba Modimo Moprefeta. Ge yo e le Mesia, gomme ga se A hwa, eupša O a phela gape, a re Mmone a dira leswao la Moprefeta. Re tla Mo dumela, gobane Mesia wa rena—wa rena ke Modimo Moprefeta.”

¹⁰⁶ Jesu o rile, ge A kopana le Petro, O rile, “Leina la gago ke Simone. Gomme leina la tatago ke Jona.” Gomme Petro o wetše

maotong a Gagwe. O tsebile gore yoo e be e le Yo a boletšwego. Ba ile kgole ka go tia, ba ile morago... Filipi o ile bakeng sa Nathaniele gomme o mmoditše se a se hweditšego.

¹⁰⁷ Gomme ge Nathaniele a etla godimo pele ga Gagwe, O rile, "Moisraele šole yo go sego bomenetša ka go yena."

O rile, "Rabi, ke neng O kilego wa ntseba?"

¹⁰⁸ O rile, "Pele Filipi a go bitša, ge o be o le ka tlase ga mohlare, Ke go bone."

¹⁰⁹ O rile, "Wena o Morwa wa Modimo. Wena o Kgoši ya Israele." Ba tsebile Yoo e be e le Mang.

Mosamaria yola, ge a rile . . .

¹¹⁰ Ge A rile, "Ntlišetše seno." Mosadi yola, setšhaba sa Samaria. O rile, "Oo, mo . . ." O rile, "Ntlišetše seno."

¹¹¹ O rile, "Ga se setlwaedi go lena Ba- . . . lena Bajuda go kgopela Basamaria dilo tše bjalo ka tše. Ke nna mosadi wa Samaria."

¹¹² O rile, "Eupša ge o ka be o tsebile Yo o bego o bolela le yena, o be o tla Nkgopela seno. O rile, Gobaneng, ga se setlwaedi go lena Bajuda go kgopela Basamaria se sebjalo."

¹¹³ Poledišano e ile pele lebakana, go fihla A bone mo mathata a gagwe a bego a le gona. O rile, "Sepela o bitše monnamogatša wa gago gomme le tle fa."

O rile, "Ga ke ne monnamogatša."

¹¹⁴ O rile, "Yeo ke nnete. O bile le ba bahlano, gomme yo o dulago le yena bjale ga se monnamogatša wa gago. O e boletše gabotse."

¹¹⁵ O rile, "Mohlomphegi!" Oo, ngwanešu, ka pela Moya wa Modimo go mosadi yola! "Mohlomphegi, ke a bona gore O moprofeta. Re a tseba gore Mesia o etla, gomme, ge A dira, O tla re botša dilo tše. Eupša Wena o Mang?"

O rile, "Ke nna Yena."

¹¹⁶ A lahla pitša yela ya meetse gomme a tloga. A hwetša seno go tšwa Sedibeng se se bego se phophomela godimo ka soulong ya gagwe. O kitimetše ka toropongkgolo gomme o rile, "Etlang, bonang Monna Yo a mpoditšego dilo tše ke di dirilego. A yoo ga se yena Mesia?"

¹¹⁷ Yoo e be e le Yena, maabane. Yoo ke Yena, lehono. Yoo ke go swana go ya go ile. "Jesu Kriste wa go swana maabane, lehono, le go ya go ile." Gobaneng re dikadika? Gobaneng re makala? A re makala ge eba Modimo o tla fodiša goba aowa? Re Mmone a fodiša dikete, difofu, balwetši, dihlotsa, digole. Bao ba hwilego, gomme ba bolelwa go hwa, ba tsogile gape, ka fase ga maatla a thapelo ya tumelo. Moya wo Mokgethwa o a utolla, gomme makgolo a fodišitšwe, mahlo a a foufaditšwego, ditsebe tša difoa. Lefase le leka go e hlokomologa. Ba leka go e hlochlora, eupša ga

ba kgone. E tla thwi morago gape. E pele ga bona. O ka se kgone go Mo hlohlora go tloga diatleng tša gago.

¹¹⁸ Ge Pentecost la mathomo e tsupologa, mengwaga ye masomenne ya go feta, ba rile, “E ka se tšee nako. Ke sehlopha sa bapshikologibakgethwa.” Mafelelong? Ke kereke ye e golago ka lebelobelo lefaseng. Ngwaga wa go feta e tšweleditše milione dikete tše makgolotlhano tša basokologi, e lego ka godimo ga tšohle dikereke ka moka di beilwe mmogo. Milione o tee dikete tše makgolotlhano, ngwaga wa go feta. Ke lena bao. Ga se go swa. Ga se—ga se go rorela. Go a swa, godimo. Ee.

¹¹⁹ Ba re, “Ba tshereane.” Ba leka go hlohlora batho go tloga go bona. Ba leka go tsea batho, “Tlogang go sehlopha sela. Le se ke la ba tlankela. Ga go selo go yona. Tlogang go Yona.”

¹²⁰ Go no swana, “Ge Ke phagamišeditšwe godimo, Ke tla gogela batho bohle go Nna.” Ge leswao le tee le legolo le eya pele, la kolobetšo ya Moya wo Mokgethwa, ba boletše ka maleme, gomme ba e dumetše. Makgolo a mantši le makgolo ba tšhologetse ka go yona. Morago go tla lefelong, ba leka go hlohlora yeo, Modimo o kgoromeleditše ka gare thwi le go fa dithlathollo godimo ga yona. Morago ka pela ge ba feditše ka seo, Modimo o rometsé seprofeto ka morago ga seo.

¹²¹ O rile, “Ge go na le yo motee magareng ga lena, yo a sego a rutega, gomme yo motee a bolela ka maleme. Eupša ge go na le yo a profetago le go bolela diphiri tša pelo, bohle ba tla wela fase le go re, ‘Modimo ka therešo o na le lena.’” Ke eng? Šeleo leswao lela la Bomesia gape le tla ka gare. Ee, mohlomphegi. Ge yo motee a utolla sephiri sa pelo, phuthego yohle e tla re, “Ka therešo Modimo o na le lena.” Leswao la Bomesia, seo ke se se tla bago. Re bona seo. Bontši ba lekago go hlohlora, ke bontši Modimo a yago go dira.

¹²² Gomme letšatši le lengwe O ya go lapa go ba šikinya. O ya go lapa go kgoromeletša Kereke yela tikologong. Gomme ge A dira, O ya go hwetša go lekanelo, gomme O ya go lokolla tlhale e tee ya kahlolo. Gomme O ya go obeletša fase ka seatla sa neng le neng le go topa Kereke ya Gagwe. O tla fofela kgole, oo, letago, a fofela kgole mosong. Oo, nna! Ke hlologela go ba fao. Ke tla ba. Mosong wola ge A tsea diphego tša mosong gomme a fofela kgole ka matsogong a Moratiwa wa gagwe, oo, a letšatši leo le tla bago!

¹²³ Lehono, re a phela. Gobaneng re tshwenyega? Gobaneng le makala? Gobaneng le leta? Bolelang gomme le ye pele. O se goelele, wa re, “O Morena, a ke thato ya Gago go fodiša, lehono?”

¹²⁴ “Nnete, ke thato ya Gago.” O RIALO MORENA, ke thato ya Gagwe.

¹²⁵ “A nka amogela Moya wo Mokgethwa lehono? A matšatši a mehlolo a fetile?” Ka kgonthe matšatši a mehlolo a fa, go ya go ile. Moya wo Mokgethwa o fa.

“A batho ba bolela ka maleme lehono?” Beibele e boletše bjalo.

“Maswao a a tla latela bona ba ba dumelago.”

¹²⁶ “A banna ba hlatholla molaetša?” Beibele e rile ba a dira. Seo se a e rarolla.

¹²⁷ O RIALO MORENA, bolela. O se ke wa lla. Bolela gomme o ye pele. Modimo ga a nyake sehlopha sa masea a go lla. O nyaka banna ba ba nago le lerapo la mokokotlo. E sego marapo a go duma, “Ke duma ge nkabe ke na le Wona. Ke duma ge nkabe ke kgona go dira se.” Marapo a mokokotlo ao a tla emago magareng, amene, a tleleima phenyo, a tleleima ke babiletšwantle, bogareng bja leswiswi. Ga go kgathale se e ka ba mang a se bolelago, re a bolela le go ya pele.

¹²⁸ Dumelang Molaetša. Modimo o mo. O tla hlatsela Molaetša wa Gagwe. Modimo o mo. Ke Modimo wa go swana yo A bego a le morago mošola ka Galelia. Ke Modimo wa go swana yoo A bilego ka matšatšing a Moshe. A ka se palelwe. A le a e dumela? Moya wo Mokgethwa o tlie, maswao a Moya wo Mokgethwa.

¹²⁹ Jesu o rile, “Ge Ke sa dire mediro ya Tate wa Ka, gona se Ntumeleng. Eupša ge Ke dira mediro ya Tate wa Ka, gona le Ntumele.”

¹³⁰ Ge A boditše mosadi sedibeng, se sengwe seo a bilego le phošo ka yena, o rile, “Yoo ke Mesia.”

¹³¹ O rile, “Yo a dumelago go Nna, mediro ye Ke e dirago o tla e dira le yena. Gomme bontši go feta bjo o tla dira, gobane Ke ya go Tate.” Bjale, King James e na le “ye megolwane.” Ge o tšea ya setlogo, ga e re “ye megolwane.” Go ka kgonega bjang gore e ka ba eng ye megolwane e dirwa? O emišitše tlhago. O fodišitše balwetši. O tsošitše bahu. O thakgafaditše balephera. Oo, O dirile se sengwe le se sengwe. Eupša O rile, “*Bontši* bja yona le tla e dira. Gobane Nka se be le lena feela, eupša Ke tla ba ka go lena, go fihla bofelong bja lefase.” A le a e dumela?

A re rapeleng.

¹³² Morena Jesu, feela lentšu le tee go tšwa go Wena le tla ra bontši go feta bareri bohole ka lefaseng ba ka kgonago go bolela. Lentšu le tee feela, Morena, bolela. “O se ke wa lla. Bolela! Eya pele.”

¹³³ Ke kgona go Go bona letšatši le lengwe o etla fase go tšwa thabeng. O be o swerwe ke tlala. O lebeletše godimo ga mohlare. O be o letetše go hwetša mago fale, gomme go be go se na le mago. Gomme O lebeletše mohlare wola gomme o rile, “O ka se tsoge wa enywa mago gape.” Gomme O sepetše.

¹³⁴ Gomme letšatši la go latela, e ka ba ka sekgalela, ge ba fetile kgauswi, mohlare o thomile go pona. Gomme yo mongwe wa baapostola, ka leina la Petro, o rile, “Bona mohlare, o ponne ka pela bjang, ge e sa le O o roga.”

¹³⁵ O rile, “Ruri, Ke re go lena, ge *wena*, ge o ka re go thaba ye, ‘Tomolwa gomme o lahlelwe ka lewatleng,’ gomme wa se belaele ka pelong ya gago, eupša wa dumela gore se o se boletšego se tla direga, o ka hwetša se o se boletšego.”

¹³⁶ O Modimo, a tshepišo! E tšwa go mang? Mohlodi wa magodimo le lefase. “O be a le ka lefaseng, gomme lefase le dirilwe ke Yena, gomme lefase ga se la Mo tseba.”

¹³⁷ Re leboga Wena, Morena, ka tshepišo ye, “Yo a dumelago go Nna, mediro ye Ke e dirago o tla e dira le yena.”

¹³⁸ Bjale, Tate, ka go... Go latela Molaetša wo, ge O ka no bolela, bošegong bjo, se sengwe ka mothalong wa kagodimogatlhago.

¹³⁹ Gore, mohlomongwe mogongwe yo mongwe fa yoo a sa nkago a ba le kgopolole gore O sa ntše o phela ka mokgwa wola, gore ba a dumela mohlomongwe gore O tsogile, gore, “Felotsoko ka Nageng ya kgole ye e bitšwago Legodimo, gore O phela kua le go e roma gohlegohle, bakeng sa rena go ba le dithutotumelo tša rena le go ya pele.” Ke bošilo gakaakang go motho go amogela seo, feela ka gobane ga se ba rutwa Beibe.

¹⁴⁰ O rile, “Ke tla ba le lena go fihla bofelong bja lefase. Ke tla ba ka go lena, gomme yona mediro ye Ke e dirago le tla e dira le lena. Ga se Nna yoo a dirago mediro, eupša Tate yoo a dulago ka go Nna.” O rile go barutiwa, “Le se eleletše seo le tlago go se bolela. Ga se lena bao le bolelago. Ke Moya ka gare ga lena, wo o bolelago.” Oo, re Go leboga bjang, Modimo yo Mokgethwā Kudukudu, bakeng sa ditshepišo tše! Ke thabile kudu go e tseba!

¹⁴¹ Pelo ya ka e tsikinyegile, go tseba gore thwi mo, nna ke šetše ke le mengwaga ye masometlhano bogolo, gomme ke phela fa ka meriting ya nako. Ka nako ya mantšiboa ya bophelo bja ka, le go bona nako ya mantšiboa ya histori ya lefase, kgauswi le go Tla ga Morena Jesu, le go tseba Therešo ye kgolo ye e khutša ka gare ga sehuba sa ka. E tuka bjalo ka mollo. Ke thabo ya go se bolelege le go tlala letago. Go na le phišegelo kua ye e biletšago, go goeletša go lefase, “Oo, Mo amogeleng, pele go eba thari kudu.”

¹⁴² Efa, Morena, gore, bošegong bjo, gore mohlala wa go phethagala wo Kriste a re filego wona, o tla bowa go rena bošegong bjo ka Maatla a tsogo ya Gagwe. E fe, Morena, bakeng sa letago la Modimo. Re e kgopela Leineng la Jesu. Amene.

Ke a Mo rata, ke a Mo rata
Gobane O nthatile pele
Gomme a lefela phološo ya ka
Godimo ga mohlare wa Khalibari.

Ke . . .

Bjale tsenang moyeng wa thapelo.

. . . Ke a Mo rata
 Gobane O nthatile pele
 Gomme a lefela phološo ya ka
 Godimo ga mohlare wa Khalibari.

[Ngwanešu Branham o thoma go hama *Ke A Mo Rata*—Mor.]

¹⁴³ Morena, O Morena, etla bjale. Re dumela Wena. Gomme re kgopela Wena go re tlotša, tlotša mohlanka wa Gago, Morena. Tšea mahlo a ka le dipounama tša ka, monagano wa ka—wa ka, mahlale a ka—a ka, a šomiše go letago la Gago. Bolela ka mohlanka wa Gago, Morena. Ekwa ka ditsebe tša phuthego. Efa letago. Hwetša letago go Leina la Gago, Morena. A nke go se be le motho wa sekoka magareng ga rena, ge tirelo ye e fedile.

¹⁴⁴ Bjale, ke boletše, Morena, go batho. Bjale, O bolele gomme re tla ya pele, go dumela Wena, gore O fa le rena. “Se boife mohlape wo monnyane, ke thato botse ya Tate go le fa Mmušo.” Re dumela seo, Tate. Bjale, tšea tirelo, Morena. Bjo ke bokgole bjo nka kgonago go ya. Go tla tšea Wena, go tloga mo go ya pele, Morena. Leineng la Jesu Kriste, nthuše. Amene.

¹⁴⁵ [Ga go selo go theipi. Ngwanešu Jackson o a profeta—Mor.] Amene.

¹⁴⁶ Bjale, seo se bitšwa moya wa seprofeto, o wela godimo ga ba go fapania. Le a bona? Bjale, O dirile “tshepišo,” O re file tshepišo, seo se ra gore O fa. Le a bona? Bjale, Junie ke moisa yo monnyane wa boi. Seo ga se go swana le yena go bolela ka mokgwa woo, eupša, ge tlotšo e swara, le a bona, ke selo sa go fapania nako yeo. Yeo ke nnete. Ke, nako ye nngwe, Moya wa Modimo o ripa boka tšoša ya magalemabedi, le a bona, gomme O dira dilo. Bjale, re leboga Modimo kudu, go bona selo se.

¹⁴⁷ Bjale, ke a dumela gore Junie le Billy ba dutše mo lebakana la go feta. A yeo ke nnete? . . . go, goba, ee, go fa dikarata tša thapelo goba se sengwe. O rile, “Go be go le ba bangwe ba batho ba etla.” Gomme re be re letetše ba se kae gape, mohlomongwe go tšwa ka ntle le go ya pele, eupša ba rile go be go se bontši kudu. Kafao re tla lokologanya ba re nago le bona, mohlomongwe, ka nako e tee.

¹⁴⁸ Re tla thoma ka nomoro tee, le go lokologanya batho bohle, le go rapelela yo mongwe le yo mongwe wa bona. Kafao re tla bona ge Morena a ka utolla e ka ba eng go rena, ka mothalong wa thapelo. Re tla thoma go nomoro tee, ra lokologanya sehlopha. Ke mang a nago karata ya nomoro tee? A o ka no tla? [Ga go selo go theipi—Mor.]

Jesu wa go kwela bohloko,
 O bolela go hlaletša pelo ye e sekamilego,
 Oo, ekwang Segalontšu sa Jesu.

Noute bosebose ka go pina ya baserafe,
 Leina le Lebosebose lelemeng la batho,
 Kherole ye bosebose e kilego ya opelwa,
 Jesu, Jesu wa go šegofala.

¹⁴⁹ Ke be ke bogetše ka mothalong. Ga ke na le nnete, ga ke nagane gore go na le yo mongwe fao . . .

¹⁵⁰ Mosetsana yo a emego thwi *fa*, o boletše le nna mosong wo, gomme o mpoditše gore o be a le fa go tšwa felotsoko, gore o—o kile a fodišwa gatee ka dikopanong, eupša ga se a ke a bolela eng kapa eng ka yenamong. O nno re o fodišitšwe gatee ka dikopanong. Ke a dumela seo se be se lokile.

¹⁵¹ Gomme moisa ka morago ga gagwe, ga ke dumele ke tseba e ka ba ofe wa bale. Goba, mohumagadi yo, ga ke tsebe.

¹⁵² Ke tseba Kgaetšedi Funk. Yo *fa*, yoo ke yena ke mo tsebago, thwi *fa*. Ke yena a nnoši ke mo tsebago fale, bokgole bjo.

¹⁵³ Bjale, ge e ka ba mang a etla ka mothalong, gomme ge ke ba tseba, gabotse, ke tla leka go se bolele e ka ba eng, le a tseba, go feta thapelo. Gobane le tla nagana gore bona batho ba e boletše go nna.

¹⁵⁴ Eupša, bjale, ga re tsebe gore Moya wo Mokgethwa o tla bolela e ka ba eng. A ka no se ke. Eupša mo go ya go phethagala, go phethagala . . .

¹⁵⁵ Ngwanešu, bjale, go ne selo se tee, ke go bolela se sengwe; selo se sengwe, ke go se bona se netefaditšwe. Beibele e rile, “Netefatšang tšohle,” (a, l tše pedi) “dilo tšohle.” Ka gona, “Swarang go tiiša go se e lego se sebotse.”

¹⁵⁶ Bjale, ge Jesu Kriste a swana maabane, lehono, le go ya go ile, ga A fetoge, gona O tla swanelo go dira ka Kerekeng ya Gagwe, go beng bjale. Ke ba bakae ba tsebago gore Kriste ke Moya wa Modimo? Bohle re tseba seo. Ke Yena motlotšwa. Jesu o be a le motlotšwa.

¹⁵⁷ Ke moo batho, ba ba dumelago gore go badimo ba bararo goba ba bane ba go fapano, ba hlakahlakanago bohle. Le a bona?

¹⁵⁸ Modimo ke Moya. Jesu o be a le mmele woo Moya wa Modimo o dutšego ka go wona; o Mo dirile Imanuele, Modimo a dula lefaseng. O be a le Modimo. Jesu Kriste o be a le Modimo, efela O be a le Morwa wa Modimo. Nama ya gagwe e be e le Morwa wa Modimo, ka gore Modimo o e hlotše, eupša, ka gare, O be a le Modimo. “Ga se Nna,” go boletše Jesu, “ke dirago mediro. Ke Tate wa Ka yo a dulago ka go Nna.” “Gomme letšatši leo, le tla tseba gore Ke ka go Tate, Tate o ka go Nna; Nna ka go lena, gomme lena le ka go Nna.” Ke lena fao.

¹⁵⁹ Bjale, ke a dumela gore mohumagadi yo o . . . Ga ke mo tsebe. Ga ke nagane ke a dira. Ge eba ke dirile, ga—ga—ga ke go tsebe bjale. Ke—ke go lebetše. Ke a thanka yeo ke nnete. Ee. Yeo ke nnete.

¹⁶⁰ Gomme mohumagadi yola *fale*, ga ke dumele ke a mo tseba; mohumagadi *yo*, goba *yola*. Ga ke dumele gore ke tseba *yo* mongwe ntle le Kgaetšedi Funk. Ge seo e le therešo, emišetšang diatla tša lena godimo. Ge ke... Yeo ke nnete. Go lokile, mohlomphegi.

¹⁶¹ Ke ba bakae ntle fale bao ba tsebago gore ga ke le tsebe, gomme efela le a babja? Phagamišetša seatla sa gago godimo, o re, “Ke—ke tla rata thapelo. Ke...” Gomme o a dumela gore Moya wo Mokgethwa o ka kgona go go kgwatha, wa go direla se sengwe, gona e no phagamišetša seatla sa gago godimo, o re, “Ke—ke—ke hloka thapelo.” Phagamišetša seatla sa gago godimo. Modimo a go šegofatše. Batho ba babedi *fale*. Mohumagadi *fa*. Go lokile. Ba bangwe, mohumagadi morago *fale*. Bjale, ga se o swanele go ba godimo *fa*.

¹⁶² Go bile le mosadi nako ye nngwe yoo a kgwathilego kobo ya Gagwe. Gomme O retologile go dikologa, o rile, “Ke mang a Nkgwathilego?”

Gomme, gobaneng, ba rile, “Bohle ba a Go kgwatha.”

¹⁶³ O rile, “Eupša ke bile go fokola. Bokwala bo tšwele go Nna.” O rile, “Ke fokotše. Bokwala... Ke a bona gore maatla a tšwele go Nna.” Gomme O lebeletše tikologong go fihla A hweditše mosadi, le go mmotša ka taba ya gagwe ya madi.

¹⁶⁴ Gomme o rile, “E eme.” A yeo ke nnete? Taba ya madi e be e eme, ka gobane o be a dumetše Jesu Kriste. Go botse bjang! Yeo ke...

¹⁶⁵ Gomme Jesu Kriste ke Moprista yo Mogolo, bošegong bjo, yo a kgonago go kgwathwa ke dikwi tša mefokolo ya rena. E no Mo kgwatha. E dumele. Ke ba bakae ba ba ntsebago, gomme efela le a tseba ga ke tsebe se e lego phošo ka wena, eupša o tla nyaka Modimo go go fodisa? Phagamišetša seatla sa gago godimo. Uh-huh. Yeo ke yona.

¹⁶⁶ Bjale e nong go lebelela ka tsela ye, gomme le dumele. Ebang le tumelo. Bjale, Beibele e tteleima gore Jesu o a swana, e tteleima gore mediro ye A e dirilego e tla dirwa ke bao ba dumetšego ka go Yena, gagolo ka matšatšing a mafelelo. A le a dumela re phela ka matšatšing a mafelelo?

¹⁶⁷ Bjale, elelwang. Maswao a Modimo, go bahlale, ke bošilo. Go tsea semoya go Le utolla, feela boka masea.

¹⁶⁸ Bjale, moprofeta o rile, “Go tla tla letšatši...” Bjale, yeo e bile e ka ba mengwaga ye makgolo a masomepedi tlhano ya go feta. “Go tla tla nako moo go ka se bego bošego goba mosegare. E tla ba letšatši la leutu. Eupša nakong ya manšiboa, letšatši le tla hlaba, e tla ba Seetša.” Ke ba bakae ba kilego ba bala seprofeto seo? Nnete. “Seetša!”

¹⁶⁹ Bjale e ra go reng? Letšatši, go ya ka thutafase, le hlaba ka Bohlabela gomme le dikela ka Bodikela. Gomme mang kapa

mang yo a tsebago histori, o a tseba gore tlhabologo e sepetše go tloga Bohlabela go ya Bodikela. China ke tlhabologo ya kgalekgale re nago le yona. Go lokile. Go tloga Bohlabela go ya Bodikela, go ile tlhabologo. Bjale, Bohlabela le Bodikela di kopane. Re lefase la go hlabologa kudu, go nagana. Batho ba go hlabologa kudukudu ba ka go... batho ba ba Bodikela. Ke ba sebjalebjale kudu. Ba na le dilo tšohle tša sebjalebjale, le go ya pele, gobane tlhabologo e gatetšepele ge e sepetše go leba bodikela.

¹⁷⁰ Bjale, ke eng e wetšego go batho ba Bohlabela? Jesu Kriste o tlie go batho ba Bohlabela, gomme Moya wo Mokgethwa o tlie ka Letšatši la Pentecost. O laeditše maswao a magolo le dimaka, morago O tlogile.

¹⁷¹ Gomme go tlie nako, ka morago ga e ka ba mengwaga ye 200 ka morago ga lehu la Kriste, e ka ba tikologo ya bobedi ya baapostola, morago ba tla ka go 300, letšatši go ya ka Pre-Nicene Fathers, histori ya histori ye kgethwa ya kereke, gore ba bopile se se bego se bitšwa bo—bo botate ba pelepele. Gomme ba bopile se se tsebjago lehono bjalo ka kereke ya Katoliki ya Roma ka Roma. Kagona, ba dirile mokgatlo wa bona wa mathomo. Gomme Roma, ge kereke ya Katoliki e bolela gore ke “mme” kereke, ka go felela ke mmago dikereke tša mokgatlo. Ke kereke ya mathomo go tsoge ya kgatlofašwa.

¹⁷² Mengwaga ye makgolotlhano, e ile ka kerekeng ya Katoliki, go fihla Martin Luther. O gwabetshe kereke ya Katoliki, ka go gana go bitša selalelo mmele wa kgonthe wa Kriste, gomme a e gwabela, gomme a lahlela selalelo lebatong. Gomme o ile a fiwa boitsholo, go abula ka matolo a gagwe, gomme o ganne go dira seo. Gomme ba dira se re se tsebago bjalo ka kereke ya Lutheran. Ba bile le kgatišo ya mahala, pampiri le go ya pele.

¹⁷³ Morago ba e kgatlofaditše le go dira mokgatlo go swana le mokgatlo wa kereke ya Katoliki. Seo se ile pele lebaka la mengwaga ye makgolo a mmalwa.

¹⁷⁴ Go bapa go tlie Zwingli. Ka morago ga Zwingli... O be a le mohuta wa—wa molahlwa. O dumetshe, gore, “Jesu o be a le Morwa wa Modimo, go fihla mo A ‘bitšwago’ Morwa wa Modimo; eupša, ‘morwa wa Josefa,’ gomme O be a se a tswalwa ka Bokgethwa.” Bjale, ba—ba batho ba Maswiss ba lekelela go thuto ya Zwingli.

Go tšwa fao go tla Calvin. Calvin o ile pele.

¹⁷⁵ Gomme go tšwa go Calvin go tšweletše ba bangwe, go fihla re hwetša John Wesley. O tsogile ka matšatšing a kereke ya Bocalvinist ya Engelane, e bego e le batho ba Anglican, Maanglo-Saxon.

¹⁷⁶ Go tšwa fao go tlie pele sehlopha sa bokgethwa, se se bitšwago Methodist. Gomme ge ba dirile, ba bopile kereke e bitšwago kereke ya Methodist. Go tšwa go kereke ya Methodist,

go tlie pele go tšwa go yeo, e tee go ya go ye nngwe. Morago go tlie Presbyterian, gomme go tšwa go Presbyterian go tlie pele ba—ba Baptist, gomme Baptist go ye . . . ye tee go ya go ye nngwe, le pele go theoga, pele go theoga, pele go theoga.

¹⁷⁷ Go fihla, kereke ya mafelelo go bopša ke Pentecostal. Gomme tšhegofatšo ya pentecostal ye e tlago ka sebopego sa Moya wo Mokgethwa, ba e kgatlofaditše. Yeo ke ka go felela.

¹⁷⁸ Modimo ga se a ke a tsoge a kgatlofatša kereke, gomme ga ke dumele a kile a tsoge a dumelela mokgatlo. Beibele e bolela kgahlanong le wona, gomme e a tleleima, gore, “Mmalegogwana,” kereke ya Roma, “o tla tšhungwa le bana ba gagwe.” Yeo ke therešo tlwa.

¹⁷⁹ Eupša go tšwa fao, “Go tlie letšatši,” leo moprofeta a rilego, “e be e se bošego goba mosegare; leutu.”

¹⁸⁰ Ba bile le Seetša sa go lekanelo, ba be ba re, “Gabotse, re a nganga. Ke rena Baptist. Ke rena Lutheran. Ke rena semangmang. Ke rena sela.” ka lebaka la mekgatlo, ditherešo tše dinnyane tše ba di hweditšego ka Beibeleng.

¹⁸¹ Luther o kgatlofaditše godimo ga, “Moloki o tla phela ka tumelo.” John Wesley o kgatlofaditše, “Tlhwekišo, mošomo wa bobedi wa kgonthe wa mogau.” Pentecost e kgatlofetše go, “Go bolela ka maleme, bjalo ka bohlatse bja Moya wo Mokgethwa.” Dilo tše tšohle ke therešo. Seo ke Seetša, eupša e sego sohle sa Sona. Gomme ge o thala thutotumelo, o swanetše go dula le yeo. O ka se kgone go šutha. Kafao, Moya wo Mokgethwa o sepelela ntle le go ya felotsoko gape, morago ba a e kgatlofatša. Bjale, yeo ke histori ye kgethwa tlwa.

Eupša bjale go tlie nako, “Dietša tša mantšiboa di tlie.”

¹⁸² Tlhabologo e tlie godimo, gomme bjale letšatši le dutše godimo ga tlhabologo. Bofelo bo fa. Bofelo bja lefase bo fa. Bofelo bja nako bo fa. Bofelo bja kereke bo fa. Dilo tšohle di tlie bofelong. Gomme feela ge letšatši le dikela . . . Letšatši la go swana le le hlabago ka Bohlabela, le dikela ka Bodikela.

¹⁸³ Modimo o tshepišitše, “Go tla ba Seetša nakong ya mantšiboa,” ka moprofeta. Morwa wa go swana yoo a tsogilego le go bontšha Moya wo Mokgethwa ka Jesu Kriste, morago ka matšatšing a pelepele, ka go bogomapono bja Bohlabela, o phadima ka go bogomapono bja Bodikela, ka go letšatši la mafelelo, go bontšha maswao a go swana ao Jesu a profetilego a tla ba. E no ba . . . Ke Mangwalo, mogwera. Eupša, wena, go tšwa go wena, se o se naganago ka Lona, le a bona.

¹⁸⁴ Mosadi šo. Sepela ka tsela ye, kgaetšedi, feela ge o ka dira. Bokgole bjo ke tsebago, ga se ka ke ka bona mosadi. Ga ke mo tsebe. O no ba mosadi, o sepeletše godimo fa. A ka no ba e le leloko la kereke ye. A ka no ba e le leloko la tabarenakele, go

ka moka ke se tsebago. Ga ke tsebe. Feela mosadi, ge nkile ka mmona pele ga lehono, ga ke tsebe. Ga ke tsebe.

¹⁸⁵ Eupsa Modimo o tseba mosadi. Gabotse, bjale, ge Jesu a swana maabane, lehono, le go ya go ile, gona o fa bakeng sa taba ye nngwe. Ga ke tsebe ke eng.

¹⁸⁶ Go ka reng ge se se no ba boka mo—mo mosadi mo sedibeng? Ga gwa swanela go ba mohuta wa go swana wa taba, eupša e ka no ba monna le mosadi ba kopana ka tsela ya go swana. Mohlomongwe mosadi ke moswaswalatši. Mohlomongwe ke Mokriste. Mohlomongwe o godimo mo o no gonona, go leka go hwetša se sengwe. Mohlomongwe o godimo mo ka gore o a babja. Mohlomongwe o godimo fa, o emetše yo mongwe gape. Ga ke tsebe. Yeo ke therešo. Nka se kgone go go botša, eupša Modimo o a tseba. Morago o re . . .

¹⁸⁷ A re re o a babja, ka gore ke tirelo ya phodišo. Mohlomongwe o a dira; go ka no se be. Eupša ge a babja, gomme oeme mo go rapelelwā, Modimo o a tseba ga ke tsebe selo ka yona. Gabotse, gona, ge ke sa tsebe mosadi, ga ke tsebe selo ka yena, gomme ka gona o nyaka Jesu, bakeng sa phodišo, ke be ke tla mmotša se, gore, “Ka megogoma ya Gagwe o fodišitšwe.”

¹⁸⁸ Bjale, phodišo e no swana le phološo. Ga o hwetše phološo bošegong bjo. Ge Jesu a hwile, O lefile bakeng sa sebe sa gago. O no e amogela. Le a bona? Ge A hwile, O tlošitše dibe tša lefase. Ge A ehwa, O fodišitše motho yo mongwe le yo mongwe a babjago. Sekoloto ka go felela se ile sa lefša.

¹⁸⁹ Bjale, go ka reng ge Jesu a ka be a le fa bošegong bjo ka sebopego sa monna, boka A bile ge A sepetsé ka Galelia? Go ka reng ge A be a apere sutu ye gomme a be a eme mo, gomme o be a eme kgaušwi le Morena wa renā? A—a . . . ka kgonthe ke be ke tla rata go ema ka mokgwa wola, go Yena. Go ka reng ge a be a eme fale, gomme O be a eme fa? Gomme O be a tla re go yena, “Mosadi, o dumela gore Ke nna Yena? Ge o sa dumele, o tla senyega.”

O be a tla re, “Ya, Morena. Ke a dumela gore O Yena.”

“Gabotse, o nyaka eng?”

“Ke nyaka phodišo, Morena.”

¹⁹⁰ “Ngwana wa Ka, a o ka se dumele gore Ke dirile seo ge Ke ehwa morago mošola, ge Ke rile go be go fedile? A Lengwalo le be le se la ngwalwa, le le boletšego gore Ke gobaditšwe ka baka la dikarogo tša lena; ka megogoma ya Ka le fodišitšwe?” Yeo ke yona.

¹⁹¹ Gabotse, bjale, o tla makala, “Ke a makala ge eba yoo ke Morena? Gore O . . . E ka ba mang a ka bolelagoso. Motho e ka ba mang a ka kgonago go rera yeo, gobane e ka Beibeleng. Eupša ge seo ka kgonthe e le Yena, O tla tseba pelo ya ka, gobane O

tsebile pelo ya mosadi mo sedibeng. Gomme O tshepišitše selo sela sa go swana.”

¹⁹² Bjale, ga se nke A re O tla tla morago ka sebopego sa mmele le go e dira, eupša O tla romela Moya wo Mokgethwa wo o tla dulago ka go rena, gore Moya wo Mokgethwa wola o tla dira diphiri tša dipelo. “Ka gore O tla le laetša dilo tše di tlago, go utolla diphiri tša dipelo.” A yeo ke therešo? O e tshepišitše. Gona ge A swana . . .

¹⁹³ Gomme ke—ke bolela se, gore ke a dumela gore Moya wo mogolo wo woo o lego magareng ga rena ke Moya wo Mokgethwa. Ke a dumela gore O mpileditše morero wo. Ga go ntire bontši e ka ba bofe go feta monna yo a pholosítšwego mosong wo; feela mohlanka wa gago, ngwaneno. Go ntira ke be yo monnyane go go feta, ka gore ke romilwe go direla. Ke nna mohlanka wa setšhaba.

¹⁹⁴ Tirelo ya bosetšhaba, ke modiredi; go direla setšhaba, go ba mohlanka, go tsea mehlahloša ye le dipelaelo tša setšhaba. E ka ba eng e lego, e emego fale. Gomme ge o se ne mogau go lekanelo go myemyela le go e tsea, gona o swanetše go ya morago Khalibari le go tiišetšagape thomo ya gago. Seo ke se o swanetšego go se dira.

¹⁹⁵ Bjale, eupša ge Kriste a le fa, gona a nke Kriste a bolele. Ga ke tsebe mosadi. Modimo o a tseba. Ga ke tsebe mosadi. Ga ke tsebe selo ka yena. Eupša ge ke boletše therešo, gona Jesu Kriste o swanetše go ema ka Lentšu la Gagwe, gobane Ke Therešo. A seo se e dira gabotse? Bohle ba rena re dumela seo. Go lokile.

¹⁹⁶ Bjale fa ke moo makgaolakgang a tlago. A Lengwalo le a rereša, goba a Le fošagetše? Bjale, fa ke moo . . . Ga se ntle ka go dikamora tsoko tša leswiswi. Ga se ntle mošola moo diabolo a šomago. E thwi fa pele ga ntlo ya Modimo, thwi moo pele ga bakgethwa ba ba tloditšwego le bana ba Modimo, barekwa ba Madi a Gagwe. Re eme fa, bobedi bja rena, pele ga Modimo le pele ga sefala se sekgethwa se, Beibele ye, Moya wo Mokgethwa o le gona. Bjale go ya go direga eng? Ke nna motho, feela boka o le. Bjale, go swanetše go tsea Mokgethwa, go swanetše go tsea Moya goba go ka se šome. Eupša ke a tseba gore O fa. O dirile tshepišo. A ka se kgone go ya morago go tshepišo.

¹⁹⁷ Bjale, Morena, go tloga bjale go ya pele ke a rapela gore O tla iponagatša Wenamong, gore batho ba ke ba bone gore O Morwa wa Modimo. Gomme se se dumeletšwe ke Wena, go phethagatša Lentšu go rena Bantle. Bajuda ba e bone ka matšatšing a bona. Basamaria ba e bone ka matšatšing a bona. Eupša Bantle ga se ba e bona, gobane e be e utilwe go bona. Gomme O rile ba tla ba le letšatši la bona. Bjale ke lebaka la Bantle, gomme O a ba bontšha. Ge O ikutolotše Wenamong bjalo ka Mesia, go Bajuda, ka go botša Petro gore o be a le mang, go botša Nathaniele mo a bego a le gona; gomme O ikutolotše Wenamong go Basamaria,

ka go botša mosadi gore, bothata bjo a bilego nabjo; gona O ka se fete Bantle, ka go no tšoena kereke. Ba swanetše go amogela tša kagodimogathago, gobane O a swana maabane, lehono, le go ya go ile, gomme O itira Wenamong go tsebja go swana. Efa, Morena, go tla ba bjalo, go phethagatša Lentšu la Gago. Leineng la Morena Jesu Kriste, ke a e kgopela.

¹⁹⁸ Gomme, Tate, ke a rapela gore O tla šireletša batho. Gobane, re lemoga gore ge meoya ye mebe e le godimo ga batho ba ba babjago, e tla ba baswaswalatši goba eng gape. Kafao ke a rapela gore O tla šireletša le go fa kgaogelo go rena bohle. Re kgopela Leineng la Kriste. Amene.

¹⁹⁹ Ke no nyaka o no araba. Sa pele, ke no nyaka go bolela le wena, boka Morena wa rena a boletše le mosadi mo sedibeng.

²⁰⁰ Bjale o re, “Gobaneng o dira seo, Ngwanešu Branham?” Go swara moya wa gago.

Go no swana le ge A dirile, o rile, “Ntlišetše seno.”

²⁰¹ O tlide, a tliša seno, o be a eya go tliša seno. Eupša o rile, “Ga se setlwaedi go lena Bajuda go kgopela Basamaria se sebjalo.”

²⁰² O thomile go bolela le yena, “Eupša ge o ka be o tsebile Yo o bego o bolela le yena.”

²⁰³ Bjale, godimo ga se, re basetsebane, go kopana lekga la rena la mathomo. Gona, o fa bakeng sa morero tsoko. Ga ke tsebe ke eng. Eupša ge Morena Modimo a ka nkutollela seo o lego fa bakeng sa sona, goba se sengwe seo o se dirilego, se sengwe seo o se lebeletšego go dirwa. Gomme ge A ka kgonia go go botša se o bego o le sona, ka nnete O tla tseba se o tla bago sona. Gobane o tla tseba ge eba yeo ke therešo goba aowa. O tseba ge eba yeo ke therešo, gobane ke wena o phetšego karolo yela ya bophelo. Gabotse, ge A ka kgonia go go botša se o bego o le sona, gona a ka kgonia go go botša se o tla bago sona, ka kgonthe o tla ikwa gabotse ka ga go e dira, a o ka se ke? Kgonthe o tla dira. Kafao seo ke sephiri sa yona. Le a bona? Ao ke maatla a yona. Woo ke Moya wo Mokgethwa, go ikutolla Yenamong, bjalo ka ge A tshepišitše.

²⁰⁴ Bjale, wena o—wena o mosadi, nna monna. Re eme fa. O ne moya, goba o ka be o se wa ema fao. Ke na le moya; ke be nka se eme mo. Ke a bona gore o Mokriste. Gobane, feela ka pela ge moya wa gago o swara fa, o amogetšwe. Moya wo Mokgethwa, wo o lego ka godimo ga rena, o go lemoga bjalo ka ngwana wa Gagwe. Bjale, ga se ke be le kgopolo, ge eba mosadi e be e le Mokriste, goba modiradibe, goba morogaki, goba eng, eupša moya wola!

²⁰⁵ Gomme bjale ge phuthego... Ke ba bakae ba kilego ba bona senepe sa Morongwa yola wa Morena, seo ba nago naso ka Washington, DC, le mogohle? Le a bona? Sese Sona, thwi fa gare ga ka le mosadi.

²⁰⁶ Bjale, o tla amogela, goba o a tseba gore Sengwe se kgauswi le wena, maikutlo a mabose ka kgonthe. Yeo ke nnete. Gore batho ba tla e tseba, e no phagamiša seatla sa gago, gore ba a bona. Ke maikutlo a mabose ka kgonthe. Ke lebeletše thwi go otologa go Seetša sela. Se sepela thwi gare ga ka le mosadi.

²⁰⁷ Bjale, Pilara yela ya Mollo e latetše bana ba Israele, ka lešokeng. E be e le ka sethokgweng se se tukago, yeo e boletšego le Moshe. Ge E be e emetšwe ka go Monna, Jesu, O rile, “Pele Abraham a be a ka ba, KE NNA.” KE NNA e bile Yena ka sethokgweng se se tukago.

²⁰⁸ Gomme mediro ye KE NNA a e dirilego, ge E be e le ka go Jesu, o tshepišitše E tla tla ka matšatšing a mafelelo le go dira selo sa go swana gape. Še E fa, Pilara ya Mollo ya go swana. Borasaense ba a e tseba. Lefase le a e tseba. Kereke e a e tseba. Re a e tseba. Še E fa. A e tla šoma? A ke selo sa go swana? Ka kgonthe. Ke selo sa go swana.

²⁰⁹ Go na le bolwetši bjo bongwe bja madi bo fošagetšego ka mosadi yo. Ke bona madi, a lebega o ka re ke a masese goba a mašweu. Oo, ke bolwetši bja swikiri. O na le bolwetši bja swikiri. Yeo ke therešo. Ga ke tsebe mosadi. A nke a be hlatse. Teko e be e bontšha se sengwe seo e bego e le bolwetši bja swikiri. [Kgaetšedi o re, “Yeo ke nnete.”—Mor.] Seo ke se e lego phošo ka wena. [“Yeo ke nnete.”] Yeo ke therešo.

Bjale o re, “O thankile seo, Ngwanešu Branham.”

²¹⁰ Re tla bona ge eba E thankile. Ntle le seo, o tlaišega ka letšhogo le legolo. Yeo ke nnete. O na le se sengwe sa phošo ka maoto a gago gape. Seo ke O RIALO MORENA. Ga se go thanka, a ke gona? [Kgaetšedi o re, “Aowa, mohlomphegi.”—Mor.] Ga o tšwe fa. O tšwa Borwa. O tšwa Texas. Leina la gago ke Mdi. Christian. Eya morago; o fodile.

²¹¹ Bjale, ga se go thanka, a ke gona, mogwera? Ke Moya wa Morena. “Ge o ka kgona go dumela.”

²¹² Nakwana feela. Le a bona? Le a bona? [Kgaetšedi o a hlalala—Mor.] O no ba a hlalala bjale, a ne nako ya go makatša ka Moyeng. Le a bona? Se sengwe se diregile go yena. Thogako e tlogetše mosadi. Ge o ka be o be o tlaišega ka mokgwa wola, ka kgonagalo o be o tla ikwela ka tsela ya go swana.

²¹³ Go lokile, mohumagadi. Bjale, a o a dumela gore Morena Jesu o a swana maabane, lehono, le go ya go ile? [Kgaetšedi o re, “Ke a dira.”—Mor.] Ge Morena Jesu a ka bolela ka nna gomme a mpotša gore bothata bja gago ke eng, o tla tseba ge eba ke therešo goba aowa. Ga o mo bakeng sa gagomong. O mo bakeng sa yo mongwe gape, morwa wa gago. Morwa o na le bothata bja leswafo, le bothata ka mala. Bjale, sakatuku sela seo o phumotšego megokgo ka sona, se bee godimo ga gagwe. Se belaele. O tla fola. Se belaele. Modimo a go šegofatše, kgaetšedi.

²¹⁴ O dira bjang, mohumagadi? Bjale, mosadi yo a emego fa o apešitšwe ke moriti go iša lehung. O a dumela Morena a ka go fodiša? Modimo o fodiša kankere. O tseba seo. Kankere ya letswele. Yeo ke nnete. Eupša o amogela phodišo ya gago. Wena o Mdi. Woodward. Bowa, dumela ka pelo ya gago yohle, e tla go tlogela. Ge o sa kgona go dumela feela boka o le bjale, o ka se hwe ka yona. Modimo a go šegofatše. Eya pele tseleng ya gago gomme o hlalale. Eba le tumelo.

²¹⁵ Bjale, yo ke mohumagadi, ke a dumela, yo a boletšego le nna mosong wo, o rile o fodišitšwe ka kopanong pele. Go lokile. [Kgaetšedi o re, “Mengwaga ye šupago ya go feta . . . ? . . .” —Mor.] Mengwaga ye šupago ya go feta. Go lokile.

²¹⁶ E no šuthela godimo, go tloga go sefehlamoya kua, ge o ka kgona, mohlomongwe o ka kgona go nkwa bokaonana gannyane. E no šuthela ka tselo ye, feela kgauswana gannyane.

²¹⁷ Gona, bokgole bjo ke tsebago, re basetsebane seng sa rena, go no se fete go re “go bjang” go wena, mosong wo. Ke le boditše, ge le nyakile se sengwe bakeng sa tlatho, bokaonana letang go fihla bošegong bjo, gore re kgone go tla mmogo ka kamoreng le go dumelela Moya wo Mokgethwa go utolla se sengwe mohlomongwe seo se tla re thusago.

²¹⁸ Bjale, o babja kudu, gobane ga o kgone le go ema fao. Gomme o—o nyaka go dumela. O leka go dumela. O kile wa apešwa ke moriti go iša lehung, le wena. Bolvetši bjola bja mafahla, goba se sengwe boka seo, bjo o bilego le bjona mengwaga ya go feta. Gomme bjale o na le bothata mogulong wa gago. [“Ee.”] Gomme o a boifa ke kankere. O a boifa gore seo ke se e lego sona. O a makala ge eba yeo ke therešo. Gape o amo—. . . O nyaka thapelo. O rapediša se sengwe, goba yo mongwe yo a lego ka legaeng la gago. Yeo ke nnete. O tšwa Ohio, Mdi. McCarroll.

²¹⁹ O Morena Modimo, Mohlodi wa magodimo le lefase, raka letšhogo go tloga go ngwana yo. Ge O boloka bophelo bja gagwe, mengwaga ya go feta, go tšwa go moriti wola, gomme wa bo bona bo feta, bo ka kgona go ba ka mokgwa wo bjalo bošegong bjo. Ke ahlola diabolo yo; tlogela mosadi, Leineng la Jesu Kriste. A nke a bowe le go fola, a tle ka go kopano ya ka moso, a fe bopaki bja phodišo ye. Leineng la Jesu Kriste. Amene.

²²⁰ Se belaele nthathana. Eya gae, o fole. [Kgaetšedi o re, “A o nagana ke tla loka, Ngwanešu Branham?” —Mor.] Kgontha. Ke a dumela o lokile. E no sepelela pele ntle kua, o thakgetše, o re, “Ke a Go leboga, Jesu.”

“Ge o ka kgona go dumela, dilo tšohle di a kgonega.”

²²¹ A o a dumela, mohlomphegi? A o ntumela go ba moprofeta wa Gagwe? [Ngwanešu o re, “Ke a dira.” —Mor.] E sego . . . Feela mohlanka wa Gagwe, o a bona, a re e bolele ka mokgwa wola. Re basetsebane seng sa rena. Ga—ga ke go tsebe, gomme ga o ntsebe. Bjale go na le se sengwe se diregile felotsoko, se sengwe se

diregile ka batheeletšing. Aowa, e be e se. Ke gape. Ke yo mongwe o mo rapedišago, ke ngwana. Yeo ke nnete. Go lokile. E be e le ngwana. Ke naganne e be e le ngwana ka batheeletšing, eupša ke ngwana wa gago. Oo, ke dilo tše mmalwa tša go fošagala. Godimo go karo ya go tsupuga ga setho, le go ya pele. O tšwa Illinois. Boela morago, eba le tumelo. Ngwana wa gago o tla fola. Modimo a go šegofatše. Etla. Morena a go šegofatše.

Wena o a dumela? Eba le tumelo go Modimo. O se ke wa kamaka.

²²² Ke tseba monna yo a dutšego mo sekhutlong. Ga ke tsebe leina la gagwe, eupša ke a tseba gore o tla mo. O tla fase, gatee ka lebakana. O tšwa Michigan. Eupša o dutše kua, o a rapela. Ga ke tsebe se bothata bja gagwe e lego, go fihla gonabjale, eupša ke a tseba bjale. Kafao ke ya go mmotša, gobane ke a dumela e ya go mo thuša. Bothata bja gago bja mokokotlo bo go tlogetše. . . ? . . . Eba le tumelo.

²²³ O dumela ka pelo ya gago yohle, mohlomphegi? Ke bothata bja madi, bolwetši bja swikiri. Ga o tšwe mo, le wena. O tšwa Georgia. Ke wena Mna. Johnson. Eya morago, dumela ka pelo ya gago yohle. Bo tla go tlogela.

²²⁴ Bjale, oo, ga ke go tsebe, ga ke dumele. Eupša ke bone Mdi. Scharrer a tšwelela fa. A Mdi. Scharrer o ka moagong? Oo, o rapediša selo sa go swana se fošagetšego ka mosadi *yo*. O na le bothata bja mogodu, gomme o na le bothata bja mogodu. Yeo ke nnete. Ke letimone lela le leka go swara yo mongwe le yo mongwe wa lena. O fodile. Eya pele gomme o fole. . . ? . . .

²²⁵ Ga o dumele seo, a o a dira? O a dumela Modimo o tla mo fodiša, a mo dira a fole, mošemane yo monnyane? O a boifa ke TB. Eupša o a dumela gore Modimo o tla e dira e be gabotse? Se tshwenyege, Kgaetšedi Funk, go tla loka. Modimo a go šegofatše.

²²⁶ Ke mang gape a nago le dikarata tša thapelo? Lebelelang, e ka ba tee goba tše pedi gape, ke a thanka.

²²⁷ A ke mmago? Ke mmone a eme kgauswi le wena nako yeo. O na le lehwa le a nyakago le rapedišwe.

²²⁸ “Ge o ka kgoni go dumela, dilo tšohle di a kgonega.” E no ba le tumelo ka go Modimo. Feela e ka ba mang wa lena, lebelela gomme o phele. A le a e dumela? Gobaneng, Kriste o fa.

²²⁹ O ikwela go fapani bjale, a ga o, kgadi? Bjale eya gae gomme o fole bjale. Feela. . . [Kgaetšedi o re, “A o a dumela ke tla fola?”—Mor.] Gobaneng, nnete. Nnete. Ke a dumela o fodile. Nnete. Amene. Feela, le a bona, wena, o na le letsvalo le molato lela le phuthetšwe go dikologa, o a bona, eupša maatla a lona a kgaogile, feela metsotso e se mekae ya go feta bjale. E no tšwelapele o dumela. Gatelela thwi go ya pele. Eya pele, bolela, “Ka megogoma ya Gagwe ke fodile.” Ema thwi godimo go yona, gomme o tla no ya pele, o fole. Se sengwe le se sengwe se tla loka.

Go lebelelelega Seetša sohle go go dikologa bjale, moo go bego go le leswiswi ge o be o le mo, sefaleng. O lokile. Tšhegofatšo e godimo ga gago bjale, ge o no tšwelapele o eya.

²³⁰ A go šegofatšwe Leina la Morena. A o dumela ka pelo ya gago yohle? Ke no ikwela boka Moya wo Mokgethwa o nyaka go dira se sengwe, thwi go ikgetha. Amene.

²³¹ Tlogela go lla, godimo fao, mohumagadi. O rapediša mogwera yo a lego ka sepetele sa New Albany, ka TB. Uh-huh.

A le a dumela O fa?

Gabotse, a re inamišeng dihlogo tša rena feela nakwana bjale.

²³² Moya wo Mokgethwa wa Modimo, ge nama ya ka e roromela, e tloditšwe ka Bogona bja Gago; e sego ya ka feela, eupša ba bangwe ka mo; Maatla a tsogo ya Gago a phela magareng ga rena feela bjale. Re a lemoga gore re eme pele ga Modimo yo a phelago Yo a šišintšego Thaba ya Sinai. E sego feela seo, eupša O tla šikinya lefase mo go Tleng ga Gagwe, Yo a tsošitšego Jesu go tšwa bahung, gomme o eme fa ka kerekeng ye nnyane ye bošegong bjo. Morena, re ka se kgone go aga lefelo le le tla swanelago Wena go tla go lona. Eupša, ka boikokobetšong bja Gago, O tla go ba ba kokobetšego kudukudu. Re leboga kudu bakeng sa seo. O re etetše. O inetefaditše ka Bowena magareng ga rena.

²³³ Re dumela Lentšu la Gago. Morena, ke Le boletše, bjalo ka mohlanka wa Gago. Bjale a nke re ye pele, bjalo ka ge Molaetša o re laleditše. A nke re ye pele, ka Maatleng a tsogo ya Gagwe. A nke go se be motho wa go fokola; a nke Moya wo Mokgethwa ka go felela o no tseela ka moagong wo bjale le go fodiša motho yo mongwe le yo mongwe a lego mo. A nke go se be le bolwetši e ka ba bofe bo šetšego magareng ga rena. A nke go se be le pelaelo e tee magareng ga batho. A nke go be le tšhikinyo ye bjalo magareng ga batho, gonabjale, gore ba tla ikwela gore dilo tšohle di gabotse. E fe, Morena.

²³⁴ Ge re sa ne dihlogo tša rena di inamišitšwe, ke nyaka motho yo o dutšego kgauswi le yena, ke go nyaka o bee diatla tša gago godimo ga motho kgauswi le wena. E no bea diatla tša gago godimo ga bona. Ka gare goba ka ntle, ga go kgathale mo o lego, bea diatla tša gago godimo ga yo motee go yo mongwe. Ga ke kgathale se o se hlokago. Seo ga se tshwenye nthathana. Ga ke kgathale moo motho a lego, a ka no ba go kgabaganya mawatle, go kgabaganya lewatlekgolo. Ga go kgathale moo e lego, Modimo o khupetša sekgoba sohle, o tlatša nako yohle. Ke mokgonatšohle. Ke motlalagohle. Yena ke—Yena ke mohlokamagomo. O mo bjale. O kwa thapelo ya gago.

²³⁵ Beibele e rile, “Maswao a a tla latela bona ba ba dumelago.” Gomme yo mongwe le yo mongwe wa lena le modumedi. “Ge ba bea diatla tša bona godimo ga balwetši, ba tla welwa ke maruru.”

²³⁶ Le na le diatla tša lena yo motee godimo ga yo mongwe. Le kgomagane godimo mo, bjalo ka sehlopha. Bjale ke nyaka le rapelelane seng sa lena. Rapelang ka tsela ya lena beng. Yo mongwe le yo mongwe wa lena e nong go thoma go rapela. Rapelela motho wa go latela, e re, “Morena, fodiša motho yo ke nago le diatla tša ka godimo ga gagwe.”

²³⁷ Morena Jesu, ge ba rapela, ekwa dithapelo tša bona, Morena, gore ba ke ba tsebe gore ga e no ba mohlanka o tee. Ke bahlanka ba Gago. Bohle re batee. Re a Go rata, Morena. Dikgato tša rena tša go fapania, dithutotumelo tša rena tša go fapania, dikerekemaina tša rena ga di tsoge tša re aroganya go tloga go Modimo wa go phela. Bjale re ka Bogoneng bja Gagwe. Re a leboga le go leboga gore O mo. Ga re na maswanedi a Bogona bja Gago, eupša re a rapela gore O tla araba thapelo ya rena. Re dira se go ya ka Lentšu la Gago. O rile, “Maswao a a tla latela bona ba ba dumelago. Ge ba bea diatla tša bona godimo ga balwetši, ba tla welwa ke maruru.” Gomme ba beana diatla seng sa bona. A nke Moya wo Mokgethwa wo mogolo Wo o kgonago go utolla diphiri tša pelo, wo o tshepišitšwego ke Beibele, Jesu yo a phelago yo a tsogilego Yo a tshepišitšego go ba le rena go fihla bofelong bja mafelelo, a nke Yena bjale a dire mošomo wo A o tshepišitšego. Re dumela Wena, Morena, ge re neela batheeletši ba ka diatleng tša Gago, Leineng la Morena Jesu Kriste. Amene.

²³⁸ Godimo ga maatlataolo a motheo a Lentšu le le ngwadilwego la Ramaatlakamoka Modimo, ka bohlatse bja Moya wo Mokgethwa Yo a lego mo a le gona, yo a tsebago diphiri tša pelo le go utolla diphiri go batho; godimo ga Bogona bja Gagwe, motheo wa Lentšu la Modimo, ke bega yo mongwe le yo mongwe wa lena, “go fodišwa,” Leineng la Jesu Kriste. A nke le tloge gomme le se tsoge la babja gape. A nke Modimo a le šegofatše le go le šireletša.

²³⁹ Ke holofela go le bona gape, ka pela ka kgonthe. Go fihla nako yeo, tirelo morago go modiša, Ngwanešu Jackson. Modimo a le šegofatše.



GOBANENG O LLA? BOLELA! NST59-1004E
(Why Cry? Speak!)

Molaetša wo ka Ngwanešu William Marrion Branham, setlogong o abilwe ka Seisimane ka Lamorena mantšiboa, Oktobere 4, 1959, ka Faith Assembly ka Clarksville, Indiana, U.S.A., o tšerwe go tšwa go theipi ya go gatišwa ya makenete gomme o ngwadilwe ntle le go fokotšwa ka Seisimane. Ye ya North Sotho phetolelo e ngwadilwe gomme ya phatlalatšwa ke Voice Of God Recordings.

NORTH SOTHO

©2023 VGR, ALL RIGHTS RESERVED

VOICE OF GOD RECORDINGS, SOUTH AFRICA OFFICE
58 DISA ROAD, ADMIRAL'S PARK, GORDON'S BAY 7140 WESTERN CAPE
REPUBLIC OF SOUTH AFRICA

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Tsebišo ka tokelo-kgatišo

Ditokelo ka moka di bolokilwe. Puku ye e ka ngwalollwa godimo ga sengwalolli sa ka gae go šomišwa ke mong goba go fiwa ntle, mahala ntle le tefo, bjalo ka sedirišwa go gaša Ebangedi ya Jesu Kriſte. Puku ye e ka se kgone go rekišwa, go tſweletšwa gape ka bopepetla, go romelwa go website, go bolokwa go sedirišwa sa go bušetša, go hlathollelwa malemeng a mangwe, goba go šomišetšwa go kgopela ditſhelete ntle le tumelelo ya go ngwalwa ya Voice Of God Recordings®.

Tshedimošo ye e Tseneletšeng goba materiale yo mongwe o leng gona, ka kgopelo ikopanye le:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org